

Htawm tem' ri tuil' ri muk kon' Hkrit Ro'ma

¹ Htawm ti ok' aen' na ko', meuh ui' Paw'lu meuh peue caee Eun Yesu' Hkrit. Peucawo' Eun klawng ui' meuh peue caee Eun Yesu' mae' gvah ri uin' ui' meuh pun leukah' mun' ren'kawn Eun Peucawo' na'. ² A meuh leukah' mun' ren'kawn ku' Peucawo' yeuh Eun kati ri tang' neum yamla ka na' ri suip Eun ri cu peue suip leukah' Eun na' ce hk'a'naee htawm Seungá na'. ³ Leukah' mun' ren'kawn aen' a to' ri ri Kon' ai' Eun Peucawo' na' Eun. Hk'a' to' Eun nham' keune na' ko', Eun meuh ceucat eun hkun'haw'hkam' Davit'. ⁴ Hk'a' to' Eun Cit' seungá chak' na' ko', Eun pun ri pao' ri meuh Kon' ai' Eun Peucawo' ri ti'ca na' ri tang kuh' im' Eun hk'ai' vang yeum na'. Eun meuh Yesu' Hkrit Cawo' Peucawo' e'. ⁵ Punta kaw e' lah' ris peue un' meuh peue ceu Yu'da na' ce ing' yum' Eun mae' leuceng ri ti Eun na', kopti meuh a Heun ri mae' punta muis Eun na', e' pun ri rap ri ti mun' sin' na' mae' pun ri meuh peue caee Eun Yesu' na'. ⁶ Pe' ku pawng' ri mae' muk peue pun ri klawng ri meuh peue Eun Yesu' Hkrit na' ce yeut.

⁷ Ui' tem' ri tuil' htawm ti ok' aen' a ri peue ut' nang veng Ro'ma ku' Peucawo' leumeus' Eun mae' ku' pun ri klawng ri meuh peue Eun na' ce ku peue.

Kah mun' sin' mae' hk'a' kuit nyawk' kuit sam'ran cumyen' lih neum Kuing' Peucawo' e' na' Eun mae' neum Cawo' Yesu' Hkrit Eun na' kue' ri pe' reu'.

Paw'lu sum' heul' eun nang veng Ro'ma

⁸ Nanggal' ka na', mun' keuting uí ri Peucawo' uí Eun ri Yesú Hkrit Eun pun pé' gawm' euc' kopti hk'a' yum' pé' na' laws' seutuin seutan ka hk'a' pang bhen' keute' na' ku duih' heul' na'. ⁹ Peucawo' Cawo' yeuh uí mhai' Eun sut' hk'a'naee hpum' ri hk'a'naee vang pao' uí leukah' mun' ren'kawn lawng Eun Kon' aí Eun na', pen' hkam' Eun sa' hki' ka kuit rot uí ri pé' laleung ¹⁰ hk'a'naee leukah' hk'o' mun' uí ku pok na'. Hk'o' uí mun', a lawn cawp' alo Eun Peucawo' ko', kah uí pun yam kaw ing' ri pé' na'.

¹¹ Punta kaw uí gvah ri tuil' lapsawng' hk'a' civit na' ri pé' punta kaw yeuh pé' kawlr' reng keuting na', uí sum' ing' hk'eup' nyu pé'. ¹² Aen' a meuh punta pé' ri maeé' uí ri kaw e' tuil' kawlr' reng puri ri hk'a' yum' e' gawm' hk'a'mawn' hk'a'maen' na'. ¹³ Ec'awng' na' pé', punta kaw uí heul' vuic plí' ku' seumal hk'a'naee pé' seun' heul' vuic uí hk'a'naee peue ceu seubu na', uí sum' kah pé' yawng rangraen uí ri kaw ing' ri pé' heun' pok hawc' (daecti rot maet'maen', a kawn' meung kue' ri ku' ham'tap).

¹⁴ Gawm' peue Helasa' na' ce, a'ko' peue un' meuh peue Helasa' na' ce, maeé' gawm' peue kue' cu'yi na' ce, a'ko' peue un' kue' cu'yi na' ce, uí kue' beus ri ce. ¹⁵ Kop awn' na, saec' meuh peue ut' nang veng Ro'ma na' pé', uí hpum' huk' nyawk' ri kaw uí pao' leukah' mun' ren'kawn na' ri pé' yeut.

¹⁶ Un' kaic uí ri leukah' mun' ren'kawn na'. Kopti leukah' mun' ren'kawn na' meuh a tí'ca Eun Peucawo' punta peue yum' na' kaw ce pun hk'a' htut lawtpon na' ku peue ri na'. Peue Yu'da na' pun ce a nanggal', hawc' ka na' peue un' meuh peue ceu Yu'da na' ce ku pun a. ¹⁷ Kopti hk'a'naee leukah' mun' ren'kawn na' hk'a' leupaws seumeu' neum Peucawo' Eun na' kaw a pun ri tuh' ri pucti lih. Hk'a' leupaws seumeu' na' ing' a neum hk'a' yum' na' palkoe. Seun' tem' a ri uin' ri hk'a'naee htawm

Seungá ná, “Peue leupaws seumeu' ná ce kaw a'yu im' ri hk'a' yum' ná.”*

Hk'a' seungeueng' Eun Peucawo' ri peue bhen' keute'

¹⁸ Peucawo' yeuh Eun hk'a' seungeueng' ri ná lih neum kuing' pang maó' ná ri ku' un' leupaws seumeu' maeé' ku' rai gawm'euc' ce peue ku' cu ku' rai ri ná kuipkang' hk'a' neumneum ná. ¹⁹ Kopti ku' cang yawng ce lawng Eun Peucawo' ná a pucti lih glih'gleueng' ri ce, kopti Peucawo' tuh' Eun ce nyu ceu nang aen' ce glih'gleueng' hawc' ná. ²⁰ Kopti tang' neum yam bhen' keute' ná pun a ri hpanpleng' ri ná, ti'ca cot'cu maeé' kue' meuh Eun ku' peue un' cang nyu peue ná e' pun ri nyu a glih'gleueng' ri neum ku' hpanpleng' Eun ná hawc'. Kop awn' na, peue ná peue un' laee kue' ku' kaw htu'hting' lah' ri un' yawng Peucawo' Eun.

²¹ Kopti ce saec' yawng Peucawo' Eun, ce un' tuil' munhpung' kuing'hpaw maeé' meuh Eun Peucawo' ná. Ce ku un' mun' keuting ri Heun, lheu' awn' na ce sawm kuit ku' un' kue' mun' un' kue' peuehot' ná. Hpum' nga' suisa ce ná a duim'lawng heul'. ²² Ce saec' lah' ri kue' cu'yi, ce meuh peue nga' suisa. ²³ Ce ti munhpung' Eun Peucawo' Cawo' un' cang lulaic heul' ná leuploh' a ri ruphtu ku' pleng' ri hot' ruprang peue ku' kaw pun ri yeum, ruprang sim', ruprang sat' muilmal sat' leun ri maeé' ruprang sat' seubu ná.

²⁴ Kop awn' na, Peucawo' Eun taé' ce yeuh map' hkuit'nawng'tang' hot' hpum' ta'nha' rai ce ná, yeuh ku' hk'o'kaic ri tu' ri ná ri puri. ²⁵ Ce ti hk'a' neumneum Eun Peucawo' ná, ce leuploh' a ri hk'a' chí'lai ná. Ce faee' yeuh mhai' ka ku' Peucawo' hpanpleng' Eun ná tang' Peucawo' Cawo' hpanpleng' Cawo' htuk' ri suk'seun' cot'cu ná Eun. Amin.

* 1:17 1:17 Habaku' 2:4

²⁶ Kop awn' na, Peucawo' Eun tae' ce hk'a'naee ta' nha' ku' hk'o'kaic na'. Saec' beun' na' ce yeuh ku' un' htuk' ce ri yeuh na'. Ce meuh beun' taw' beun' it' tiduih'. ²⁷ Saec' meuh me na' ce ku yeuh seun' awn' a yeut. Ce yut' hk'a' sum' it' mae' beun' na', ce sum' it' mae' me. Me taw' me na' ce it' tiduih' yeuh ku' hk'o'kaic na' ri puri. Ce pun hk'a' ciyang na' kuing' hpaw mae' ku' kleuc' yeuh ri na' hawc'.

²⁸ Lheu' awn' na, kopti un' nyu ce ngos ka yawng ce Peucawo' Eun na', Peucawo' Eun tae' ce kue' hpum' rai na', Eun tae' ce yeuh ku' un' kuing' un' hpaw na'. ²⁹ Hk'a'naee ce na' a nuknhen' ri ku' un' leupaws seumeu', ku' rai, law' hpa mae' hpum' hk'aw' jeuk na' ku' ceu. Ce nuknhen' ri hk'a' hkoemang', hk'a' toh peue, hk'a' kleuc' leumeul, hk'a' cop' long chi' lai mae' hk'a' kuit rai na'. Ce ren' mae' leukah' cok' cec', ³⁰ peusah' nyoe, nyu Peucawo' Eun pereng ri, leukah' hpa' rai, leukah' mhawng' ri hk'o'cuin mae' tang' tu' ri lhung' keuting. Ce kuit ri nawk hk'a' hk'u' kaw ri yeuh ku' rai na'. Ce sawng' un' leuceng makuiing' ri. ³¹ Ce meuh peue mhuik' mhuik', un' kue' kati, un' kue' hk'a' leumeus' keus mae' un' cang tukyak. ³² Ce saec' yawng ritroe hk'a' leupaws seumeu' Eun Peucawo' na' lah' ka peue yeuh ceu nang aen' a na' kuing' ce ri kaw yeum na' ko', ce kawn' meung suip ri yeuh ceu nang aen' ce heul' palkoe na' a hkuin' nang hk'o', daecti ce kawn' ren' mae' peue yeuh ceu nang aen' a na' ce yeut.

2

Hk'a' taws' a' mu leupaws seumeu' Eun Peucawo'

¹ Kop awn' na, peue taws' a' mu ri peue na' pe', pe' hkuin' kaw kue' ku' htu' hting' kopti pe' lawn taws' a' mu na' yeuh sa' nhaw' ri peue ko', tang taws' pe' a yeuhko' ri ti meun yeut. Kopti pe' saec' na' meuh nang taws' a' mu ko', pe' ku kawn' yeuhko' yeut. ² E' ku tup yawng Peucawo' taws' Eun

a'mu na' hot' ku' meuh neumneum na' ri peue yeuh ku' yeuhko' na' ce. ³ Kop awn' na, gup meuh pe' peue yawo pe' taws' a'mu na' ri peue daecti pe' kaw'n' buih yeuh ri seun' ku' yeuh ce na', pe' hteum' ri kaw pon hk'a' taws' a'mu ciyang Eun Peucawo' na' aw? ⁴ A'ko', kaw'n' un' nawpsang pe' hk'a' tuckyak, hk'a' yeun' hkam mae' hk'a' kuit lang' htonnuk Eun Peucawo' na' aw? Hk'a' tuckyak Eun Peucawo' na' va ka pe' kaw tang taws' hpum' fuin map' ri na', un' yawng pe' a aw?

⁵ Daecti kopti hpum' cen' un' taws' hpum' fuin pe' map' ri na', pe' buih ro hk'a' seungeueng' Eun Peucawo' na' ri tu' ri na' meun pun seunyi seungeueng' Eun Peucawo' yam yeuh Eun hk'a' taws' a'mu leupaws seumeu' ri na' pucti lih na'. ⁶ Peucawo' "kaw Eun tuil' a kuing' hpaw hot' mae' ku' sawng' sawng' yeuh peue na'."* ⁷ Pun ce peue co'ca' ri yeuh ku' chak', hot' ri sok munhpung' lhung' keuting mae' hot' ri sok a'yu cot'cu na' ce ko', Peucawo' Eun kaw tuil' cit' tip a'yu tip cot'cu na' ri ce. ⁸ Daecti peue sok mun' pun tu' ri meun, peue un' hot' ri yeuh hk'a' neumneum na' mae' peue hot' ri yeuh hk'a' rai na' kaw ce pun ri rap ri ti hk'a' seungeueng' na' mae' hk'a' ciyang Eun Peucawo' na'. ⁹ Hk'a' tukhka na' mae' hk'a' kuit teuk na' kaw a rot ri peue yeuh ku' rai na' ce ku peue. Rot ri peue ceu Yu'da na' ce nanggal', hawc' ko' ri peue un' meuh peue ceu Yu'da na' ce. ¹⁰ Daecti hk'a' munhpung' lhung' keuting na' mae' hk'a' kuit nyawk' kuit sam'ran cumyen' na' kaw a rot ri peue yeuh ku' chak' na' ce ku peue. Rot ri peue ceu Yu'da na' ce nanggal', hawc' ko' ri peue un' meuh peue ceu Yu'da na' ce.

¹¹ Kopti Peucawo' un' keue' Eun ri buh peue.

¹² Peue un' kue' leukah' ritroe ce yeuh map' gawm'euc' ri na' kaw ce pun ri lulaic kopti un' to' ri ri leukah'

* 2:6 2:6 Suk'seun' 62:12; Leukah' rui' 24:12

ritroe na'. Peue ut' hk'a'ruim leukah' ritroe ce yeuh map' gawm'euc' ri na', kaw ce pun ri hkam' hk'a' taws' a'mu na' hot' leukah' ritroe na'. ¹³ Kopti peue leupaws seumeu' nanggal' Eun Peucawo' na' ce hkuin' meuh peue pun ri mhawng' leukah' ritroe na', daecti peue hot' ri yeuh leukah' ritroe na' ce palkoe Peucawo' sawn' Eun ce meuh peue leupaws seumeu'. ¹⁴ Yam peue un' meuh peue ceu Yu'da ku' un' kue' leukah' ritroe na' yawng ce ri yeuh ku' kue' hk'a'naee leukah' ritroe na', ce saec' na' un' kue' leukah' ritroe, ce meuh leukah' ritroe ri meun. ¹⁵ Kopti ritroe ka leukah' ritroe na' tem' a ri hk'a'naee hpum' ce na', ce yeuh a pucti lih. Saec' meuh hpum' cang yawng ce na' a ku' hkam' sa'hki' ka. Ku' cawp' un' cawp' na', kamkuit ce na' lah' meun ka a ri tu' ce na'. ¹⁶ Ceu nang aen' ce kaw a meuh pucti lih hk'a'naee seunyi yam Peucawo' kaw Eun taws' a'mu ri ku' mo' ri hk'a'naee peue na' ri cu Eun Yesu' Hkrit Eun hot' seun' ku' lah' ri hk'a'naee leukah' mun' ren'kawn paou' ui' na'.

Peue Yu'da na' ce mae' leukah' ritroe

¹⁷ Lah' meun mi ri meuh peue Yu'da. Mi puing leukah' ritroe na'. Mi mhawng' ri hk'o'cuin lah' ri yawng Peucawo' Eun. ¹⁸ Kopti pun mi ri rin leukah' ritroe na', mi yawng alo Eun na' mae' yawng ku' cawp' na'. ¹⁹ Nhen'nghos' nyawk' mi mae' yum' mi meuh ri nang teuk' va peue ngai' lec' na' ce mae' mi meuh nang til' ku' ceng' na' ri peue ut' hk'a'naee hk'a' duim'lawng na' ce. ²⁰ Kopti kue' mi cu'yi mae' mi yawng hk'a' neumneum gawm'euc' ka hk'a'naee leukah' ritroe na', mi hteum' ri meuh nang sangsawn' peue nga'o' na' ce mae' nang sangsawn' kon' nyom na' ce. ²¹ Kop awn' na, cawo' sangsawn' peue na' mi, un' sangsawn' mi tu' ri na' meun aw? Mi sangsawn' leukah' mun' un' kah peue rabawk', mi kawn' rabawk' aw? ²² Cawo' lah' pawlaee len'cu na' mi, kawn' len'cu mi aw?

Peue jeuk ruphtu na' mi, con' mi nya hk'o' mun' keuting na' aw? ²³ Peue puing leukah' ritroe na' mi hpum' keuting mae' ka na' mi, kaw'n' yeuh mi munhpung' Eun Peucawo' na' lu ri kleuc' mi leukah' ritroe na' aw? ²⁴ Seun' tem' a ri hk'a'naee htawm Seunga' na', "Muis Eun Peucawo' na' pun a ri hkam' hk'a' un' nawpsang na' hk'a'naee muk ce peue un' meuh peue ceu Yu'da na' meuh a kopti pe' ri."†

²⁵ Mi lawn roksa' leukah' ritroe na' ko', hk'a' ton' duing' hak' na' kue' a ngos yeut. Daecti mi lawn kleuc' leukah' ritroe na' ko', seun' mi nang un' nang pun ri lec hk'a'naee vang ton' duing' hak' na' ko'. ²⁶ Peue un' pun ri ton' duing' hak' ri na' ce lawn hot' ri yeuh ku' lah' ka leukah' ritroe na' ko', Peucawo' sawn' Eun ce seun' pun ce ri ton' duing' hak' ri na' ko', un' meuh ka aw? ²⁷ Peue ce saec' na' un' pun ri ton' duing' hak' hk'a' nham' keune ri na' daecti ce leuceng ri ti leukah' ritroe na' ko', kaw'n' kaw ce tang' map' ri peue kue' leukah' ritroe tem' ri uin' ri, pun ri ton' duing' hak' ri na' daecti yeuh kleuc' ri leukah' ritroe na' pe'.

²⁸ Taengtaeng peue Yu'da na' hpaw ce ca' meuh peue Yu'da hk'a'nok ri koe. Saec' meuh ton' duing' hak' na', a ku hkuin' meuh ton' duing' hak' hk'a'nok ri mae' hk'a' nham' keune ri na' koe. ²⁹ Daecti taengtaeng peue Yu'da na', ce kaw kah ri meuh peue Yu'da hk'a'naee ri. Taengtaeng ton' duing' hak' na' a meuh ton' duing' hak' hk'a'naee hpum' ri ri cit' seunga' na', a hkuin' meuh ton' duing' hak' ri ritroe tem' ri meuh tu' htawm na'. Peue yeuh keutit' na' pun ce hk'a' suk'seun' na' a hkuin' ing' neum peue, daecti a ing' neum Peucawo' Eun.

3

Hk'a' kati keutawn' Eun Peucawo'

† 2:24 2:24 I'saya' 52:5; Yesahkela' 36:22

¹ Kop awn' na, meuh peue ceu Yu'da na' a ci' kue' mun' lheu' peue un' meuh peue ceu Yu'da na' yeuh sa'nhaw'? A'ko', ton' duing' hak' na' a ci' kue' mun' yeuh sa'nhaw'?
² Ku hk'a' ku ceu na' kue' a mun' heun' yeut. Mun' nanggal' keuhti na' a meuh pun ce ri rok'sa' leukah' Eun Peucawo' na'.

³ Peue ngon' ce lawn un' kati keutawn' ko', ce ci' na' yeuh sa'nhaw'? Kopti un' kati keutawn' ce na', a yeuh kati Eun Peucawo' na' lu aw'? ⁴ A hkuin' meuh, peue saec' meuh nang chi'lai ku peue ri, daecti Peucawo' kati keutawn' Eun neumneum. Seun' tem' a ri uin' ri nang htawm Seunga' na',

“Leukah' Mi na' cawp' ka na' puc a ri lih hk'a'nae
 vang leukah' Mi na',

leukah' taws' a'mu Mi na' pe ka.”*

⁵ Daecti hk'a' un' leupaws seumeu' e' na' a lawn yeuh hk'a' leupaws seumeu' Eun Peucawo' na' gawm pucti lih ko', a ci' kaw lah' ri yeuh sa'nhaw'? Peucawo' yeuh Eun hk'a' seungeueng' ri na' lih rot hk'a'pang e' na', kaw e' lah' Eun meuh mae' hk'a'mawn' hk'a'maen' aw'? (Aen' a, lah' ui' a hot' seun' hk'a' peue na' htu'hting' ce puri na' ko'.) ⁶ A hkuin' yeuh keutit'. Kopti a lawn yeuh keutit' ko', Peucawo' Eun ci' kaw cang taws' a'mu ri bhen' keute' na' yeuh sa'nhaw'? ⁷ Peue ngon' na' peue cang htu'hting' lah', “Hk'a' kati un' keutawn' ui' na' a lawn yeuh hk'a' kati keutawn' Eun Peucawo' na' gawm pucti lih ko', kopti yeuh a munhpung' Eun na' huk'hawn' na', a ci' meuh kop keunhaw' ui' vae' kawn' pun ri hkam' hk'a' taws' a'mu lah' ui' meuh peue map' na'? ⁸ A ci' meuh kop keunhaw' ce vae' un' lah', ‘Punta ku' chak' na' kaw a keut' kue' na', pawh e' yeuh ku' rai na' pawh.’ Ngon' peue saesawm' lah'

* 3:4 3:4 Suk'seun' 51:4

ui' lah' a yeuh keutit'." Peue lah' a yeuh keutit' na' kuing' ce ri pun hk'a' ciyang na'.

Un' kue' a peue leupaws seumeu' saec' ti peue

⁹ Kop awn' na, e' ci' kaw lah' a yeuh sa'nhaw'? Peue Yu'da na' e', chak' e' hk'ai' peue seubu na' ce aw? Un' meuh. Tawn seuji e' pe' nyu a hawc', gawm' peue Yu'da mae' peue un' meuh peue ceu Yu'da na' ut' peue hk'a'ruim ti'ca ka map' na' seun' puri gawm'euc' yeut.

¹⁰ Seun' tem' a ri uin' ri nang htawm Seungá' na',

"A hkuin' kue' peue leupaws seumeu' saec' ti peue, un' kue' a saec' ti peue.

¹¹ A hkuin' kue' peue leuceng pun saec' ti peue.

A hkuin' kue' peue hot' ri sok Peucawo' Eun saec' ti peue.

¹² Peue eung' kui' ri ri Peucawo' Eun gawm'euc'.

Ce keut' ri meuh peue un' kue' ngos.

A hkuin' kue' nang yeuh ku' chak' saec' ti peue,

ti peue yawo a hkuin' kue'."†

¹³ "Hk'ung' ce na' a meuh keutui' leumuic tuh' ri na'.

Dak' ce na' a cang chi'lai."‡

"Pit ka seueueng' sa'haó' na' a pom ri ri hoeng' ce na'."§

¹⁴ "Moeng ce na' a nuknhen' ri leukah' jha' na' mae' leukah' seueum' seue' na'."*

¹⁵ "Cung ce na' a hpai' vae' ri yeuh peue yeum.

¹⁶ Ce yeuh hk'a' lulaic na' mae' hk'a' kuit nyhap' kuit yak na' hot' hk'a' heul' ri na' ce.

¹⁷ Hk'a' ka hk'a' kuit nyawk' kuit sam'ran cumyen' na' ce hkuin' yawng a."†

† 3:12 3:12 Suk'seun' 14:1-3; 53:1-3; Tuil' cu'yi 7:20 ‡ 3:13 3:13 Suk'seun' 5:9 § 3:13 3:13 Suk'seun' 140:3 * 3:14 3:14 Suk'seun' 10:7 † 3:17 3:17 I'saya' 59:7, 8

¹⁸ “Ce hkuin' kue' hk'a' lhat' til ri Peucawo' Eun na' hk'a' naee kamkuit ri.”[‡]

¹⁹ Yawng e' ritroe lah' ri hk'a' naee leukah' ritroe na' lah' a ri ri peue ut' hk'a' ruim leukah' ritroe na' ce. Aen' a meuh punta kaw a dop moeng ce peue gawm'euc' na' yeuh ce un' laee kue' ku' kaw htu' hting' na' mae' punta kaw a yeuh peue bhen' keute' gawm'euc' na' peue pun ri ut' hk'a' ruim ka hk'a' taws' a' mu Eun Peucawo' na'. ²⁰ Kopti meuh a hot' ri yeuh leukah' ritroe na', a' nhaw' hkuin' pun ri meuh peue leupaws seumeu' nanggal' Eun Peucawo' saec' ti peue. Kopti leukah' ritroe na' gup meuh a ku' tuh' e' yawng kue' e' map' na' yeuhko'.

Leupaws seumeu' ri hk'a' yum'

²¹ Daecti maet' maen', pun e' ri nyu a hawc' hk'a' leupaws seumeu' lih neum Peucawo' Eun na' ut' a hk'a' pang ka leukah' ritroe na'. A meuh hk'a' leupaws seumeu' ku' htawm leukah' ritroe na' mae' htawm ce peue suip leukah' Eun Peucawo' na' hkam' a sa' hki' ka na'. ²² Hk'a' leupaws seumeu' lih neum Peucawo' Eun aen' cu a hk'a' yum' hk'a' naee Yesu' Hkrit Eun na' a lih rot ri peue yum' na' ce gawm'euc'. Peue gawm'euc' na' peue hkuin' chat puri, ²³ kopti yeuh peue map' na' ku' peue, peue hk' uic' hk'ai' munhpung' Eun Peucawo' na'. ²⁴ Kopti meuh a mun' Eun Peucawo' na', Eun sawn' e' meuh peue leupaws seumeu' ri hk'a' htut lawtpon lih neum Yesu' Hkrit Eun na' hk'a' naee vang un' ti Eun ngos ka. ²⁵ Peucawo' yeuh Eun Yesu' Eun meuh ku' tan saic' ri tec map' ri peue kue' hk'a' yum' hk'a' naee nham' Eun Yesu' na' ce. Peucawo' yeuh Eun ku' yeuhki' na' meuh a punta kaw Eun yeuh hk'a' leupaws seumeu' ri na' pucti lih. Kopti meuh a hk'a' hpum' yeun' hkam Eun na', Eun hkuin' ciyang map' yeuh peue nanggal' na'. ²⁶ Yeuh Eun ku' yeuhki' na' meuh a

[‡] 3:18 3:18 Suk'seun' 36:1

punta kaw Eun yeuh hk'a' leupaws seumeu' cu maet'maen' Eun na' pucti lih na'. Aen' a meuh tuh' Eun meuh ri Cawo' leupaws seumeu' na' mae' Eun ku kah peue kue' hk'a' yum' hk'a'nae' Yesu' Eun na' ce meuh peue leupaws seumeu' yeut na'.

²⁷ Kop awn' na, e' ci' kue' keunhaw' e' mhawng' ri hk'o'cuin mae' ka? A hkuin' kue'. E' mhawng' ri hk'o'cuin mae' keunhaw'? Mhawng' e' ri hk'o'cuin mae' roksa' e' leukah' ritroe na' aw? A hkuin' meuh, daecti mhawng' e' ri hk'o'cuin mae' hk'a' yum' na'. ²⁸ Kopti pun e' ri nyu peue na' leupaws seumeu' peue kopti meuh a hk'a' yum' na', a hkuin' meuh kopti hot' ri yeuh leukah' ritroe na'.

²⁹ Peucawo' meuh Eun Peucawo' ce peue Yu'da na' palkoe aw? Eun ku meuh Peucawo' ce peue un' meuh peue ceu Yu'da na' yeut, un' meuh ka aw? Meuh ka yeut, Eun ku meuh Peucawo' ce peue un' meuh peue ceu Yu'da na' yeut.

³⁰ Kopti kue' a Peucawo' ti peue koe yawo na', Eun sawn' peue pun ri ton' duing' hak' ri na' ce meuh peue leupaws seumeu' ri hk'a' yum' na'. Eun ku sawn' peue un' pun ri ton' duing' hak' ri na' ce meuh peue leupaws seumeu' ri hk'a' yum' ti ceu awn' a yeut. ³¹ A lawn yeuh keutit' ko', yeuh e' leukah' ritroe na' hk'o'hk'awng' ri hk'a' yum' aen' a aw? A hkuin' meuh, daecti gawm yuk e' leukah' ritroe na'.

4

Abraham leupaws seumeu' eun ri hk'a' yum' na'

¹ Yeuh keutit' ko', e' ci' kaw lah' lawng eun Abraham a'ta' keuting e' na' yeuh sa'nhaw'? ² Neumneum ka na ko', Abraham eun lawn na' leupaws seumeu' ri ku' yeuh eun na' ko', eun kaw lheu' ri ku' mhawng' ri hk'o'cuin. Daecti nanggal' Eun Peucawo' na' a hkuin' yeuh keutit'.

³ Nang htawm Seunga' na' a ci' lah' a yeuh sa'nhaw'? A

lah', "Abraham yum' eun Peucawo' Eun. Kopti meuh a hk'a' yum' eun na', Peucawo' Eun sawn' eun meuh peue leupaws seumeu' na'."*

⁴ Ngos reng pun eun peue yeuh kan' na' a hkuin' sawn' ri meuh lapsawng', daecti meuh a ngos reng yeuh eun kan' na'. ⁵ Daecti peue ti ri peue eun yum' Peucawo' Cawo' yeuh peue rai na' ce keut' ri meuh peue leupaws seumeu' na' Eun. Peue awn' eun saec' na' un' yeuh keunhaw' daecti kopti meuh a hk'a' yum' eun na', Peucawo' Eun sawn' eun meuh peue leupaws seumeu'. ⁶ Davit' eun ku lah' a seun' awn' a yam lah' eun lawng hk'a' hpum' sam'ran ce peue ku' Peucawo' sawn' Eun ce meuh peue leupaws seumeu' ri hk'a'naee vang un' yeuh ce keunhaw' na'. Eun lah',

⁷ "Peue pun hk'a' ploé' map' ri ku' kleuc' yeuh ce na' maeé' peue pun hk'a' ti ri tec map' ri na', kaw ce pun mun'.

⁸ Peue ku' Peucawo' un' laee sawn' Eun map' ce na', kaw ce pun mun'."†

⁹ Peue pun ri ton' duing' hak' ri na' ce palkoe pun ce mun' aen' a aw? A'ko', saec' meuh peue un' pun ri ton' duing' hak' ri na', kaw ce pun mun' aen' a yeut aw? Lah' ui' a heul' hawc', Peucawo' sawn' Eun hk'a' yum' eun Abraham na' meuh hk'a' leupaws seumeu' eun na'. ¹⁰ Aen' a ci' meuh yamnhaw'? Meuh a nanggal' ka yam un' nang pun eun ri ton' duing' hak' ri na' aw, a'ko' meuh a hawc' ka yam pun eun ri ton' duing' hak' ri na' aw? A hkuin' meuh hawc' ka yam pun eun ri ton' duing' hak' ri na', daecti meuh a nanggal' ka yam un' nang pun eun ri ton' duing' hak' ri na' hawc'. ¹¹ Ton' eun duing' hak' ri na' meuh a het' ka ta'ra' ka hk'a' leupaws seumeu' pun eun ing' kopti kue' eun hk'a' yum' yam un' nang pun eun ri ton' duing' hak' ri

* 4:3 4:3 Yamla 15:6, 22 † 4:8 4:8 Suk'seun' 32:1, 2

na'. Kop awn' na, eun meuh a'kuiing' ce peue yum' hawc' daecti ce un' nang ton' duing' hak' ri na' ce punta Peucawo' Eun ku kaw sawn' ce meuh peue leupaws seumeu' na' yeut. ¹² Eun ku meuh kuiing' ce peue ton' duing' hak' ri na' ce yeut. Peue aen' ce hkuin' ton' duing' hak' ri palkoe, daecti ce a'yu im' hot' hk'a' yum' ku' Abraham kue' eun tang' neum nanggal' ka yam un' nang lec eun hk'a'naee hk'a' ton' duing' hak' na'.

¹³ Peucawo' yeuh Eun kati ri kaw tuil' bhen' keute' na' meuh sin' ri Abraham eun mae' ceucat eun na' ce a hkuin' meuh kopti leuceng eun ri ti leukah' ritroe na', daecti a meuh kopti Peucawo' sawn' Eun eun meuh peue leupaws seumeu' ri hk'a' yum' na'. ¹⁴ Kopti peue leuceng ri ti leukah' ritroe na' ce lawn kaw meuh peue pun sin' na' ko', hk'a' yum' na' a hkuin' kaw kue' ngos keunhaw', kati sat'ca' Eun Peucawo' na' a ku na' meuh ku' hk'o' hk'awng'. ¹⁵ Kopti leukah' ritroe na' ti a hk'a' seungeueng' Eun Peucawo' na' lih rot. Tawngnhaw' na' a lawn un' kue' leukah' ritroe ko', mawn' na' a ku hkuin' kue' yeuh ku' kleuc' ri ritroe na' yeut.

¹⁶ Kop awn' na, punta kati sat'ca' Eun Peucawo' na' kaw a meuh hot' mun' na' heul' mae' punta ceucat eun Abraham na' ce ku peue kaw ce pun ri rap ri ti kati sat'ca' Eun Peucawo' na' neumneum na', kati sat'ca' Eun Peucawo' na' a ing' neum hk'a' yum' na'. A hkuin' meuh peue leuceng ri ti leukah' ritroe na' ce palkoe, daecti a ku meuh peue kue' hk'a' yum' seun' Abraham eun na' ce yeut. Abraham eun meuh kuiing' e' gawm'euc'. ¹⁷ Hot' seun' ku' tem' a ri nang htawm Seunga' na', "Kah Ui' mi meuh kuiing' ce peue ceu gawm'euc' na'."‡ Abraham eun meuh kuiing' e' nanggal' to' nha' Eun Peucawo' Cawo' Abraham yum' eun Eun na'. Eun meuh Peucawo' Cawo' tuil' civit im'

‡ 4:17 4:17 Yamla 17:5

ri peue yeum na' ce mae' Cawo' cang yeuh ku' un' kue' a kue' na' Eun.

¹⁸ A saec' un' laee kue' vang keutui' hpum' saec' yawo peunae', Abraham eun ku kawn' meung yum' ri kopti kue' eun vang keutui' hpum' na'. Eun pun ri meuh kuiing' ce peue ceu heun' ceu na' seun' Peucawo' lah' Eun a ri heun hawc' na', "Ceucat mi na' kaw ce heun' nyawk'." § ¹⁹ Yam pun eun ri hk'eup' lawng ku' meuh neumneum ka lawng ka tu' eun na' seun' a pun a ri yeum hawc' ko' kopti a'yu eun na' rot a hk'ao ri tipak' neum na', mae' yam pun eun ri hk'eup' lawng ku' meuh neumneum Sara' ka meuh peue tan' ka un' cang kue' kon' na', hk'a' yum' eun na' a hkuin' yawm' lih. ²⁰ Eun hkuin' keuyuih' fuii'fai' kangkae ri kati Eun Peucawo' na', daecti eun gawm kaw' reng keuting hk'a'naee hk'a' yum' na'. Eun tuil' munhpung' ri Peucawo' Eun. ²¹ Eun yum' nyawk' Peucawo' kue' Eun ti'ca kaw cang yeuh kati yeuh ri na' htonnuk na'. ²² A meuh kopti awn' a hawc', "Peucawo' Eun sawn' eun meuh peue leupaws seumeu'." ²³ Leukah' lah', "Peucawo' Eun sawn' eun meuh peue leupaws seumeu'" aen' a ko', a hkuin' tem' ri uin' ri meuh pun heun palkoe, ²⁴ daecti a ku meuh pun ku' Peucawo' sawn' Eun meuh peue leupaws seumeu' ku' yum' Cawo' yeuh Peucawo' Yesu' e' na' Eun tang kuh' im' hk'ai' vang yeum ri na' e'. ²⁵ Yesu' pun Eun ri ap ri yeum kopti meuh a map' e' na'. Hawc' ko', Eun tang kuh' im' punta kaw e' meuh peue leupaws seumeu' na'.

5

Hk'a' kuit nyawk' kuit sam'ran cumyen' mae' hk'a' ren'kawn suk'seun'

¹ Kopti pun e' ri sawn' ri meuh peue leupaws seumeu' ri hk'a' yum' na' hawc' na', e' kue' hk'a' kuit nyawk' kuit

§ 4:18 4:18 Yamla 15:5

sam'ran cumyen' na' mae' Peucawo' Eun ri Yesu' Hkrit Eun. ² Eun va e' ing' cawng hk'a'ruim rum ka mun' aen' a ri hk'a' yum' na'. E' kue' hk'a' ren'kawn suk'seun' na' hk'a'naee hk'a' keutui' hpum' kaw pun ri pawng' ri mae' munhpung' Eun Peucawo' na'. ³ Lheu' awn' na, e' ku ren'kawn suk'seun' hk'a'naee hk'a' tukhka ri na' yeut, kopti yawng e' hk'a' tukhka na' yeuh a hk'a' yeun'hkam na' keut' kue'. ⁴ Hk'a' yeun'hkam na' a yeuh meuh e' peue Peucawo' cang lo' Eun e' na' pucti lih. Aen' a yeuh e' kue' hk'a' keutui' hpum'. ⁵ Hk'a' keutui' hpum' na' a yeuh hpum' e' na' un' cang lu, kopti Peucawo' buit Eun hk'a' leumeus'keus ri na' ri e' ri Cit' seunga' chak' ku' Peucawo' tuil' Eun a ri e' hawc' na'.

⁶ Yam kaw' reng kloee e' na', Hkrit Eun hkam' ri yeum pun peue map' hk'a'naee yam ka na' cawp' ka na'. ⁷ Peue hkam' ri yeum pun peue leupaws seumeu' na' un' chae' kue' ka, a tup na' chak' cang kue' nang kaw hkam' ri yeum pun peue chak' nyawk' na'. ⁸ Daecti Peucawo' tuh' Eun e' nyu hk'a' leumeus'keus meun ri na' ri cus' Eun Hkrit Eun lih yeum pun e' yam kaw' buih meuh e' peue map' na'.

⁹ E' pun ri meuh peue leupaws seumeu' ri nham' Eun Hkrit na' hawc', lheu' awn' na, e' kaw pun ri lawtpon hk'a' seungeueng' Eun Peucawo' na' ri Hkrit Eun neumneum. ¹⁰ Kopti yam buih meuh e' ransu Eun Peucawo' na', e' lawn tang htuk'lung Eun ri hk'a' yeum Eun Kon' ai' Eun na' ko', lheu' awn' na kopti htuk'lung e' Peucawo' Eun hawc' na', e' kaw pun hk'a' htut lawtpon na' ri hk'a' tang kuh' im' Eun na' neumneum. ¹¹ A hkuin' kaw nang yeuh keutit' koe, daecti e' ku ren'kawn suk'seun' hk'a'naee Peucawo' Eun kopti Cawo' e' Yesu' Hkrit yeuh Eun e' htuk'lung Peucawo' Eun hawc' na'.

Hk'a' yeum na' ing' a neum Adam eun, hk'a' civit na' a ing' neum Hkrit Eun

¹² Kop awn' na, seun' meuh a kopti Adam eun ti peue na' map' na' a ing' lec pang bhen' keute' na', map' na' a ti hk'a' yeum na' ing'. Kopti peue na' yeuh peue map' na' ku peue ri, hk'a' yeum na' a ing' rot ri peue gawm'euc'.

¹³ Neumneum ka na' ko', tang' neum yam leukah' ritroe na' un' nang kue' ka na', map' na' kue' a pang bhen' keute' na' hawc'. Daecti yam leukah' ritroe na' un' nang kue' ka na', map' na' a hkuin' nang sawn' ri meuh map'. ¹⁴ A saec' yeuh sa'nhaw', tang' neum cu eun Adam na' rot ti cu eun Mo'se na', hk'a' yeum na' a u'peung hk'a' pang peue gawm'euc' na' peue, peue saec' na' un' yeuh ku' kleuc' ri leukah' tuil' Eun Peucawo' na' seun' ku' Adam yeuh eun na'. Adam meuh eun het' Eun Yesu' Hkrit Cawo' ku' kaw ing' hot' na' Eun.

¹⁵ Daecti lapsawng' chak' Peucawo' tuil' Eun na' chat nyawk' a map' eun Adam na'. Kopti peue heun' na' ce lawn pun ri yeum kopti ku' kleuc' yeuh eun Adam ti peue yawo na', lheu' awn' na, mun' mae' lapsawng' Eun Peucawo' ri mun' Eun Yesu' Hkrit ti peue yawo na', a ci' na' pe lhae' heul' ri peue heun' na' peue a'ngeng. ¹⁶ Lapsawng' Eun Peucawo' na' chat nyawk' a hk'ai' pli' ka map' eun Adam ti peue na'. Hk'a' taws' a'mu na' keut' kue' a hawc' ka yam Adam yeuh eun map' ti pok yawo na'. A yeuh hk'a' ciyang na' ing' rot. Daecti lapsawng' tuil' Eun Peucawo' na' keut' kue' a hawc' ka yam peue na' yeuh peue ku' kleuc' heun' pok na'. A yeuh peue na' peue meuh peue leupaws seumeu'. ¹⁷ Kopti, kop meuh a ku' kleuc' yeuh eun Adam ti peue yawo na' peue pun ri yeum ku peue ri seun' Adam eun, lheu' awn' na, peue pun ri rap ri ti mun' na' mae' lapsawng' ka hk'a' leupaws seumeu' Eun Peucawo' ku' mhe' Eun ri uin' a htonnuk veh na', kaw ce pun ri a'yu im' mae' Peucawo' Eun kop meuh a peue ti peue yawo na' Eun, peue aen' a meuh Yesu' Hkrit Eun.

¹⁸ Kop awn' na, ku' kleuc' yeuh eun Adam ti pok yawo na' seun' yeuh a peue gawm'euc' na' peue pun ri hkam' hk'a' ciyang na' ko', hk'a' leupaws seumeu' yeuh Eun Yesu' Hkrit ti pok yawo na' a ku yeuh peue gawm'euc' na' peue pun ri sawn' ri meuh peue leupaws seumeu' na' yeut. Hk'a' sawn' peue meuh peue leupaws seumeu' aen' a ko', a ti ri ing' tuil civit ri peue gawm'euc' aen' ce. ¹⁹ Seun' kopti meuh a peue ti peue yawo na' un' leuceng eun ri ti na' a yeuh peue heun' na' peue meuh peue map' na', seun' awn' na, kopti meuh a peue ti peue yawo na' leuceng Eun ri ti na' a ku yeuh peue heun' na' peue meuh peue leupaws seumeu' yeut.

²⁰ Punta ku' kleuc' na' kaw a gawm kue' heun' na', leukah' ritroe na' a bae a. Daecti tawngnhaw' na' a lawn gawm kue' map' na' heun' ko', mun' na' a ku kaw jaen gawm kue' lheu' awn' na. ²¹ Seun' map' na' yeuh a peue yeum na', mun' na' a ku yeuh peue meuh peue leupaws seumeu' mae' a'yu im' cot'cu ri Cawo' e' Yesu' Hkrit Eun.

6

Yeum hk'a'naee map' na' daecti civit im' hk'a'naee Hkrit Eun

¹ Yeuh keutit' ko', e' ci' kaw lah' a yeuh sa'nhaw'? Punta mun' na' kaw a gawm kue' heun' na', kaw e' htuk' ri suip ri yeuh map' na' bae aw? ² Pawlaee kah a yeuh keutit'. Yeum e' nang map' na' hawc'. E' ci' kaw tang suip ri a'yu im' hk'a'naee map' na' yeuh sa'nhaw'? ³ Peue rap ri ti hk'a' cum' ing' lec hk'a'naee Yesu' Hkrit Eun na' e' gawm'euc', e' ku rap ri ti hk'a' cum' ing' lec hk'a'naee hk'a' yeum Eun na' hawc', un' yawng pe' a aw? ⁴ Kop awn' na, punta saec' tu' e' na' kaw a pun a'yu hk'u' seun' Peucawo' kah Eun Hkrit Eun tang kuh' im' hk'ai' vang yeum ri munhpung' Eun A'kuiing' na', e' pun ri puing' ri mae' Heun hawc' ri rap e' ri ti hk'a' cum' ing' lec hk'a'naee hk'a' yeum Eun na'.

⁵ Kopti e' lawn pun ri yeum mae'e' Heun ko', e' ku kaw pun ri tang kuh' im' mae'e' Heun neumneum. ⁶ Kopti yawng e' punta tu' ka map' e' na' kaw a pun ri lulaic heul' na', mae'e' punta kaw e' un' laee suip ri meuh mhai' ka map' na', jawngku' tu' hk'im' e' na' a pun ri tawk' ri mae'e' Heun hawc'. ⁷ Kopti a'nhaw' lawn yeum heul' ko', un' laee cang yeuh eun map' na'.

⁸ E' lawn yeum mae'e' Hkrit Eun hawc' ko', e' yum' kaw ri a'yu im' mae'e' Heun. ⁹ Kopti yawng e' Hkrit pun Eun ri kuh' im' hk'ai' vang yeum ri na', Eun hkuin' kaw laee yeum bae. Hk'a' yeum na' a hkuin' kaw laee suip ri kue' ti'ca hk'a'pang Heun. ¹⁰ Pun Eun ri yeum na', yeum Eun pun peue map' na' peue ti pok yawo a hk'o', daecti pun Eun ri a'yu im' na', a'yu im' Eun ri Peucawo' Eun.

¹¹ Seun' awn' na, sawn' meun pe' yeum ri map' na' mae'e' sawn' meun pe' a'yu im' pun Peucawo' Eun hk'a'naee Yesu' Hkrit Eun reu'. ¹² Kop awn' na, pawlaee tuil' map' na' u'peung tu' cang yeum pe' ku' kaw cu' pe' yawm' ri hot' ri yeuh hk'a' ta' nha' rai ka jawngku' tu' pe' na'. ¹³ Pawlaee ap hk'eung ka tu' pe' na' ri map' na'. Map' na' kaw a yeuh a meuh hk'eung ka ku' rai na'. Daecti tan jawngku' tu' pe' na' ri Peucawo' Cawo' yeuh pe' tang kuh' im' hk'ai' vang yeum na' Eun reu'. Tan hk'eung ka tu' pe' na' ri Heun, kah a meuh hk'eung ka hk'a' leupaws seumeu' na' reu'. ¹⁴ Map' na' kaw a un' laee suip ri meuh cawo' pe' heul' bae, kopti hpaw pe' ca' laee ut' hk'a'ruim ka leukah' ritroe na', daecti ut' pe' hk'a'ruim ka mun' na'.

Mhai' ka hk'a' leupaws seumeu'

¹⁵ Yeuh keutit' ko', a ci' kaw tang yeuh sa'nhaw'? Kopti un' laee ut' e' hk'a'ruim ka leukah' ritroe na', daecti e' ut' hk'a'ruim ka mun' na', e' kaw yeuh map' na' aw? Pawlaee kah a yeuh keutit'. ¹⁶ Un' yawng pe' a aw, pe' lawn yawm' ri leuceng leukah' a'nhaw' ko', meuh pe' mhai' eun hkawn'

a? Meuh pé mhai' ka map' ku' va pé heul' ri hk'a' yeum na' aw, a'ko' meuh pé mhai' ka hk'a' leuceng ri ti ku' va pé heul' ri hk'a' leupaws seumeu' na' aw? ¹⁷ Daecti mun' keuting ri Peucawo' Eun. Pé saec' na' tawn meuh mhai' ka map' na', pé ku yum' leukah' sangsawn' tuil' ri ri pé na' sut' hpum' ri. ¹⁸ Pun pé ri rap ri ti hk'a' lawtpon hk'ai' map' na', pé keut' ri meuh mhai' ka hk'a' leupaws seumeu' na' hawc'.

¹⁹ Lah' ui' a ri pé yeuh keutit' na' meuh a kopti meuh pé peue kaw' reng kloe na'. Nanggal' aen' na, seun' tawn tuil' pé hk'eung ka tu' ri na' meuh mhai' ka ku' hk'aw' jeuk na' mae' ku' rai ku' gawm baet ri heun' un' cang sut' un' cang euc' na' ko', maet' maen', kah hk'eung awn' a meuh mhai' ka hk'a' leupaws seumeu' na' reu' punta kaw pé keut' ri seunga' chak' na'. ²⁰ Yam meuh pé mhai' ka map' na', un' pun pé ri ut' hk'a' ruim ka hk'a' leupaws seumeu' na'. ²¹ Yam awn' na, pé ci' pun mun' keunhaw' ri ceu nang awn' na. Maet' maen', meuh a ku' hk'o'kaic pun pé'. Vang tisut' ka ceu nang aen' a meuh a hk'a' yeum na'. ²² Daecti maet' maen', pun pé ri lawtpon hk'ai' map' na', pé pun ri meuh mhai' Eun Peucawo' hawc'. Pé pun ri saic' ri seunga' chak'. Vang tisut' ka na', pé kaw pun cit' tip a'yu tip cot'cu na'. ²³ Kopti ngos reng ka map' na' meuh a hk'a' yeum na'. Daecti lapsawng' lih neum Peucawo' Eun na' a meuh cit' tip a'yu tip cot'cu hk'a' naee Yesu' Hkrit Cawo' meuh Peucawo' é na' Eun.

7

Leukah' leupong' lawng hpo'me

¹ Ec'awng' na' pé, un' yawng pé a aw, leukah' ritroe na' kue' a ti'ca hk'a' pang peue cu yam kaw'n' a'yu im' peue na' palkoe? Mhaing' ui' a yeuhki' na' kopti buih leukah' ui' mae' peue yawng leukah' ritroe na' pé. ² U'hpama ri, hot'

seun' leukah' ritroe na' ko', beun' ti ri is' me na' cu yam me eun na' kaw'n' a'yu im' eun na', beun' aw'n' eun to' ri ri me ri na' eun. Daecti me eun na' eun lawn yeum heul' ko', beun' na' eun un' laee ut' hk'a'ruim ka ritroe meuh hpo'me na'. ³ Kop aw'n' na, yam me eun na' un' nang yeum eun na' eun lawn ti ri is' me seubu ko', eun kaw pun ri meuh peue len'cu. Daecti me eun na' eun lawn yeum heul' hawc' ko', beun' na' eun pon ritroe aw'n' na. Eun saec' na' ti ri is' me seubu ko', eun un' laee meuh nang len'cu.

⁴ Kop aw'n' na ec'awng' ui' na' pe', saec' pe' ri yeum pe' hk'ai' leukah' ritroe na' kopti Hkrit yeum Eun pun pe' na'. Aen' a meuh punta kaw pe' un' laee pun ri meuh is' ka leukah' ritroe na' daecti meuh pe' is' Eun Hkrit Cawo' tang kuh' im' hk'ai' vang yeum ri na' Eun. Aen' a meuh punta kaw e' tan plí' ri na' ri Peucawo' Eun na'. ⁵ Kopti nanggal' aen' a na', a'yu im' e' hot' hk'a' nham' keune na'. Leukah' ritroe na' a kah e' yeuh ku' rai na'. Plí' ka ku' rai na' a yeuh e' yeum. ⁶ Daecti maet'maen' kopti yeum e' ri hk'ah' ku' tawn mawt ka e' nanggal' hawc' na', e' pun ri pon hk'ai' leukah' ritroe na' hawc'. Aen' meuh a punta kaw e' yeuh mhai' ka hot' hk'a' hk'u' hot' Cit' seunga' na'. A hkuin' laee meuh hot' hk'a' hk'im' hot' leukah' ritroe tem' ri na'.

Ham'tap map'

⁷ Yeuh keutit' ko', e' ci' kaw htuk' ri lah' a yeuh sa'n-haw'? Leukah' ritroe na' meuh a map' aw? Un' meuh. Neumneum ka na' ko', a lawn un' kue' leukah' ritroe na' ko', map' na' a meuh keunhaw' na' ui' hkuin' kaw yawng a. Kopti leukah' ritroe na' a lawn un' lah', "Pawlaee ta'nha' law'hpa",* ko', ui' hkuin' kaw yawng ta'nha' law'hpa na' meuh a keunhaw'. ⁸ Daecti map' na' a cu leukah' ritroe na' a yeuh ta'nha' law'hpa ku ceu na' keut' kue' hk'a'naee

* 7:7 7:7 Pucti heul' 20:17; Saw'n' leukah' mun' 5:21

uí na'. Kopti a lawn un' kue' leukah' ritroe na' ko', map' na' yeum ka. ⁹ Nanggal' aen' na, uí hkuin' nang yawng leukah' ritroe na'. Uí hteum' hpum' ri na' chak'. Daecti yam yawng uí leukah' ritroe na', uí yawng meuh ri peue map', uí kaw pun ri yeum. ¹⁰ Hteum' uí leukah' ritroe na' ti hk'a' a'yu im' na' lih, daecti neumneum ka na' ko', a vae' ti hk'a' yeum na' lih ri uí. ¹¹ Kopti map' na' cu a leukah' ritroe na' a ing' cop' uí yeuh ku' kleuc' na'. Map' na' a yeuh uí yeum ri leukah' ritroe awn' na. ¹² Kop awn' na, leukah' ritroe na' a seunga' chak'. Saec' meuh ritroe na' a ku seunga' chak', leupaws seumeu', a chak'.

¹³ Yeuh keutit' ko', ku' chak' na' yeuh ka uí yeum aw? Un' meuh. Daecti map' na' a cu ku' chak' na' a yeuh uí yeum. Aen' meuh a punta leukah' ritroe na' kaw a tuil' uí nyu map' na' rai nyawk' ka na'.

¹⁴ Yawng e' leukah' ritroe na' lih a neum Cit' seunga' na'. Daecti uí gup meuh yawo peue. Uí pun ri paing' ri meuh mhai' ka map' na'. ¹⁵ Uí hkuin' yawng ku' yeuh meun ri na', kopti un' yeuh uí ku' sum' yeuh ri na'. Daecti uí hpawt' ri yeuh ku' pereng ri na'. ¹⁶ Uí lawn yeuh ku' un' sum' yeuh ri na' ko', uí ku sahpaw' leukah' ritroe na' chak'. ¹⁷ Kop awn' na uí hkuin' meuh nang yeuh meun a, daecti map' ut' hk'a'naee uí na' meuh a nang yeuh a. ¹⁸ Yawng uí hk'a'naee tu' uí na' un' kue' a ku' chak' na' saec' ti ceu, awn' a meuh hk'a' nham' keune uí na'. Kopti uí saec' sum' yeuh ku' chak' na', uí hkuin' yeuh a. ¹⁹ Kopti un' yeuh uí ku' chak' sum' yeuh uí na', daecti ku' rai ku' un' sum' yeuh uí na' uí hpawt' ri yeuh a laleung. ²⁰ Uí lawn yeuh ku' un' sum' yeuh uí na' ko', a hkuin' meuh ku' tu' uí na' yeuh meun ka. Daecti map' ut' hk'a'naee tu' uí na' a meuh nang yeuh a.

²¹ Kop awn' na pun uí ri nyu ritroe ti ceu, yam sum' yeuh uí ku' chak' na', ku' rai na' a ku ut' mae' uí mawn'

hawc'. ²² Kopti vang rui' ka hpum' ui' na', ren' ui' mae' leukah' ritroe Eun Peucawo' na'. ²³ Daecti ui' pun ri nyu ritroe seubu ut' a hk'a'naee ui' na' bae' keuhti, ritroe awn' a ham'tap ritroe ut' hk'a'naee hpum' ui' na'. A yeuh ui' meuh peue htawng' ka ritroe ka map' ku' ut' hk'a'naee tu' ui' na'. ²⁴ A ci' yeuh keunhaw' ui' vae' meuh peue hk'o'sum' tukyak yeuhki'. A'nhaw' ci' kaw cang teum'kawm ui' pon hk'ai' tu' ka hk'a' yeum aen' a pun? ²⁵ Mun' keuting ri Peucawo' Eun. Pun ui' ri pon ri Yesu' Hkrit Peucawo' e' na' Eun.

Kop awn' na hk'a' civit na' ko', ui' meuh mhai' ka ritroe Eun Peucawo' na'. Daecti hk'a' nham' keune na' ko', ui' meuh mhai' ka ritroe ka map' na'.

8

A'yu hk'a' Cit' seunga'

¹ Kop awn' na, maet' maen' a hkuin' kue' hk'a' ciyang ri peue ut' hk'a'naee Yesu' Hkrit Eun na' ce. ² Kopti meuh a Yesu' Hkrit Eun na', ritroe ka Cit' seunga' ka a'yu na' a plo'e' pe' hk'ai' ritroe ka map' na' mae' ritroe ka hk'a' yeum na'. ³ Kopti hk'a' nham' keune na' yeuh a leukah' ritroe na' kaw'l'reng kloe na' ku' leukah' ritroe na' yeuh un' pun ka na' Peucawo' Eun yeuh a hawc' ri cus' Eun Kon' ai' ri na' Eun lih seun' peue map' na' punta kaw Eun meuh ku' tan htut map' na'. Kopti yeuh a ki' na', Eun pun ri taws' a'mu ciyang map' ce peue map' na'. ⁴ Yeuh Eun keutit' na' meuh a punta ritroe leupaws seumeu' ka leukah' ritroe na' kaw a htonnuk hk'a'naee peue un' a'yu im' hot' hk'a' nham' keune daecti a'yu im' hot' hk'a' Cit' seunga' na' e'.

⁵ Peue a'yu im' hot' hk'a' nham' keune na' tang' ce hpum' ri na' ri ku' sum' is' ce hk'a' nham' keune na'. Daecti peue a'yu im' hot' hk'a' Cit' seunga' na' ce tang' hpum' ri na' ri ku' sum' is' ka Cit' seunga' na'. ⁶ Hpum' ce peue map' na'

va ka ce heul' lec hk'a' yeum na'. Daecti hpum' Cit' seungá u'peung ka na' va ka ce heul' lec hk'a' áyu na' maeé hk'a' kuit nyawk' kuit sam'ran cumyen' na'. ⁷ Hpum' nuknhen' ri map' na' meuh a ransu Eun Peucawó'. A un' yawm' ri ut' hk'a' ruim ka leukah' ritroe Eun Peucawó' na', a ku un' cang ut' ri ka yeut. ⁸ Peue hk'a' nham' keune na' u'peung ka na' ce hkuin' cang meuh peue htuk' hpum' Eun Peucawó'.

⁹ Daecti Cit' seungá Eun Peucawó' na' a lawn ut' hk'a'naee pé' ko', pé' hkuin' pun hk'a' u'peung ka hk'a' nham' keune na', daecti pé' pun hk'a' u'peung ka hk'a' Cit' seungá na'. A'nhaw' lawn un' kue' Cit' seungá Eun Hkrit na' ko', hkawn' un' meuh eun is' Eun Hkrit. ¹⁰ Daecti Hkrit Eun lawn ut' hk'a'naee pé' ko', tu' pé' na' a saec' na' yeum kopti meuh a map' na' ko', daecti civit pé' na' a kaw pun ri áyu im' kopti meuh a hk'a' leupaws seumeu' na'. ¹¹ Cit' seungá Eun Cawó' Cawó' yeuh Yesu' Eun tang kuh' im' na' a lawn ut' hk'a'naee pé' ko', Cawó' Cawó' yeuh Hkrit Eun tang kuh' im' na' Eun kaw tuil' civit na' ri tu' kaw kah ri yeum pé' na'. Eun tuil' civit awn' a ri hk'a'naee cu Eun Cit' seungá ut' hk'a'naee pé' na'.

¹² Kop awn' na ec'awng' na' pé', kue' e' ku'ma. Daecti a hkuin' meuh ku'ma kaw pun ri áyu im' hot' hk'a' nham' keune na'. ¹³ Kopti pé' lawn áyu im' hot' hk'a' nham' keune na' ko', pé' kaw pun ri yeum. Daecti pé' lawn cu Cit' seungá na' toh kan' rai yeuh pé' ri tu' ri na' ko', pé' kaw pun ri áyu im'.

¹⁴ Kopti Cit' seungá Eun Peucawó' na' a lawn teuk' va a'nhaw' ko', hkawn' meuh eun kon' Eun Peucawó'. ¹⁵ Pé' hkuin' pun cit' ku' kah pé' meuh mhai' ka hk'a' lhat' ruing na' bae, daecti pun pé' Cit' seungá ku' yeuh pé' meuh kon' Eun Peucawó' na'. E' klawng Eun, "Aba', A'kuiing'." ¹⁶ Cit' seungá na' maeé civit e' na' a htawhkam lah' meuh e' kon' Eun Peucawó' na'. ¹⁷ Maet'maen' e' lawn meuh kon'

Eun hawc' ko', e' ku meuh nang hk'a sin'. Meuh nang hk'a sin' Eun Peucawo' na' mae' meuh nang hk'a sin' tiduih' mae' Hkrit Eun yeut. E' lawn pun ri hkam' hk'a' tukhka na' mae' Hkrit Eun tiduih' ko', e' ku kaw pun ri pawng' ri mae' munhpung' Eun na' mae' Heun.

Munhpung' kaw ing' hk'a' nanggal'

¹⁸ Nyu ui' hk'a' tukhka e' yam maet'maen' na' a hkuin' kaw nang keuteul munhpung' kaw tuil' e' nyu a na'. ¹⁹ Ku Peucawo' hpanpleng' Eun gawm'euc' na' punta Peucawo' kaw Eun tuh' a nyu a'nhaw' ci' meuh kon' Eun Peucawo' na', a buih ko' ri nawk a. ²⁰ Kopti ku' Peucawo' hpanpleng' Eun na' pun a ri hkam' ri yeuh hk'a' keutui' hpum' ri na' kleuc'. A hkuin' meuh hot' alo ka meun, daecti a meuh hot' alo Eun Cawo' u'peung pleng' a meuh yeuhko' na' Eun. Hk'a'naee vang keutui' hpum' ²¹ ku' hpanpleng' aen' kaw a pun ri pon hk'ai' hk'a' lulaic ku' mawt a ri na' mae' kaw a pun ri ti ri ing' hk'a'naee hk'a' lawtpon ce kon' Eun Peucawo' na'.

²² Yawng e' ku' Peucawo' hpanpleng' Eun na' buih nyel ka seun' keuteul sui' kaw keut' kon' na' rot yam maet'maen' na'. ²³ A hkuin' meuh awn' a palkoe, saec' e' ri ku' meuh peue pun pli' nanggal' ka Cit' seunga' na' e' ku nyel hk'a'naee hpum' ri yam buih ko' e' kaw ri meuh kon' Eun na'. Aen' a meuh tu' e' na' pun a hk'a' htut lawtpon na'. ²⁴ Kopti hk'a'naee hk'a' keutui' hpum' aen' na, e' pun hk'a' htut lawtpon na' hawc'. Hk'a' keutui' hpum' cang nyu e' na' a hkuin' meuh hk'a' keutui' hpum'. A ci' kue' a'nhaw' ku' pun eun ri nyu hawc' na', eun tang keutui' hpum' a? ²⁵ Daecti e' lawn keutui' hpum' ku' un' nang nyu ri na' ko', e' kaw ko' ceu nang awn' a hk'a'naee hk'a' yeun'hkam ri na'.

²⁶ Seun' awn' na, Cit' seunga' na' a teum'kawm e' yam kaw'l'reng kloe e' na'. E' kaw htuk' ri hk'o' mun' hk'o'

keunhaw' na', hpaw e' ca' yawng a, daecti Cit' seunga' na' a hk'o' meun a tang' e'. A nyel hk'o' mae' leukah' un' cang lah' vangdoh' ri na'. ²⁷ Peucawo' Cawo' caet ri nawk hpum' e' na' yawng Eun vang keutui' hpum' ka Cit' seunga' na', kopti Cit' seunga' na' hk'o' a mun' tang' peue Eun Peucawo' na' ce hot' seun' alo Eun Peucawo' na'.

Jaen meuh cawo' pe

²⁸ Yawng e' Peucawo' yeuh Eun ku' chak' na' hk'a'nae ku ceu pun peue ku' hk'o' ce leumeus' Eun na' ce. Peue aen' ce meuh peue ku' Peucawo' klawng Eun ri ti hot' seun' alo Eun na'. ²⁹ Kopti punta Kon' ai' Eun na' kaw Eun meuh kon' nanggal' hk'a'nae ec'awng' heun' peue na' ce, peue leuk Eun ri uin' tang' neum nanggal' na' Eun tang' ri uin' ce meuh seun' Kon' ai' ri ko'. ³⁰ Peue tang' Eun ri uin' tang' neum nanggal' na', Eun ku klawng ce yeut. Peue Peucawo' klawng Eun na', Eun ku sawn' ce meuh peue leupaws seumeu'. Peue pun ri sawn' ri meuh peue leupaws seumeu' na' Eun ku kaw tuil' ce is' munhpung' na' yeut.

³¹ Yeuh keutit' ko', e' ci' kaw lah' a yeuh sa'nhaw'? Peucawo' Eun lawn ut' hk'a' e' ko', a'nhaw' ci' kaw cang ham'tap e' pun? ³² Cawo' ku' un' laee mang' Kon' ai' ri ti peue na', daecti Eun tuil' Kon' ai' ri na' Eun ri e' na', Eun kawn' kaw un' cang tuil' ku ceu na' mae' Kon' ai' na' Eun tiduih' ri e' aw? ³³ A'nhaw' ci' kaw cang tang' a'mu ri peue Peucawo' leuk Eun ri ti na' ce? Saec' tu' Eun Peucawo' na', sawn' Eun e' meuh peue leupaws seumeu', ³⁴ a'nhaw' ci' kaw cang tang' a'mu ri e' bae? Yesu' Hkrit Cawo' pun ri yeum na', mae' lheu' awn' na Peucawo' Eun yeuh Eun tang kuh' im' hawc' na', maet'maen' Eun mok' hk'a' ti' a'tawm' Eun Peucawo'. Eun ku buih hk'o' mun' tang' e'. ³⁵ A'nhaw' ci' kaw cang ti e' gah' hk'ai' hk'a' leumeus' keus Eun Hkrit na' pun, hk'a' tukhka, hk'a' nyhap', hk'a' keunhap' nokneh, hk'a' ngeup' ri, un' kue'

hk'ohk'eung, hk'a' hk'o'lhat' mae' moeng leungawng aen' ce aw? ³⁶ Seun' tem' a ri hk'a'naee htawm Seunga' na',
 "Kopti meuh a Mi ri, e' pun ri hkam' hk'a' yeum na' gawm' seunyi.

E' pun ri sawn' ri meuh kon'yung' kaw ti ri heul' toh ri na'."*

³⁷ A hkuin' yeuh keutit', daecti hk'a'naee ceu nang aen' ce, jaen meuh e' nang pe a ri ri Cawo' leumeus' e' na' Eun. ³⁸ Kopti yum' ui' a neumneum, hk'a' yeum a'ko' hk'a' a'yu im', in'hpom a'ko' seuca' rai, maet' maen', a'ko' hk'a' nanggal', saec' meuh ti'ca keunhaw' na', ³⁹ vang lhung', a'ko' vang rui', saec' meuh ku' Peucawo' hpanpleng' Eun ku ceu na' ce kaw un' cang ti e' gah' pun hk'ai' hk'a' leumeus' keus Eun Peucawo' ku' kue' hk'a'naee Yesu' Hkrit Cawo' Peucawo' e' na' Eun na'.

9

Peucawo' leuk Eun ri ti peue I'sarela'

¹ Lah' ui' leukah' neumneum na' hk'a'naee Hkrit Eun, ui' hkuin' chi' lai. Hpum' cang yawng ui' na' meuh a sa'hki' ui' hk'a'naee Cit' seunga' chak' na'. ² Kuit nyhap' nyawk' ui'. Hk'a'naee hpum' ui' na' a kuc' ha' ron laleung. ³ Kopti sum' kah ui' a lawn kaw cang ko', kah tu' ui' na' hkam' hk'a' jha' na' meun mae' hkam' hk'a' peut' deut hk'ai' Hkrit Eun na' pun ec'awng' ku' meuh peue ceu ui' na' ce. ⁴ A meuh peue I'sarela' na' ce. Ce pun ri meuh kon' Eun Peucawo', pun ri rap ri ti munhpung', kati sat'ca', leukah' ritroe, ritroe hk'o' mun' hk'a'naee nya hk'o' mun' keuting na' mae' kati sat'ca' Eun na' gawm'euc'. ⁵ A'ta' keuting ce na' meuh ce peue keuting. Saec' meuh yam Hkrit meuh Eun peue na', Eun ku suip' ceucat ce na' ing'. Hkrit Cawo'

* **8:36** 8:36 Suk'seun' 44:22

meuh Peucawo' hk'a' pang ku ceu gawm'euc' na' pun Eun hk'a' suk'seun' na' cot'cu ri. Amin.

⁶ Daecti a hkuin' to' ri meuh leukah' Eun Peucawo' na' lu ka. Kopti a hkuin' to' ri meuh peue suip' ceucat peue I'sarela' ku peue na' meuh ce peue Eun Peucawo' gawm'euc'. ⁷ A hkuin' to' ri meuh peue suip' ceucat Eun Abraham ku peue na' meuh ce kon'hk'i Eun Abraham gawm'euc'. Kopti nang htawm Seunga' na' lah', "Ceucat mi na' sawn' a ri neum ceucat eun I'cak' na' ce palkoe."*

⁸ Ku' sum' lah' ka na', kon' Eun Peucawo' na' hpaw ce ca' ing' neum hk'a' nham' keune na', daecti meuh kon' hot' leukah' kati sat'ca' Eun Peucawo' na' sawn' ce ri meuh ceucat eun Abraham. ⁹ Kopti leukah' kati sat'ca' na' a lah', "Yam hpawt' ri na' a lawn rot ko', Ui' kaw tang ing'. Sara' eun kaw keut' kon' me ti peue."†

¹⁰ A hkuin' nang meuh awn' a palkoe. Daecti Rebae'ka mae' I'cak' ku' meuh a'ta' keuting e' na' ka kue' kon' seuklap'. ¹¹ Daecti nanggal' ka yam kon' seuklap' na' un' nang keut' ka na', a'ko' nanggal' ka yam un' nang yeuh ka ku' chak' na', a'ko' ku' un' chak' na', punta alo Eun Peucawo' leuk Eun ri ti peue na' kaw a suip ri ut' na', ¹² a hkuin' meuh kopti yeuh a ri daecti a meuh kopti Cawo' leuk ri ti na' Eun, Eun lah' a ri Rebae'ka ka, "Nang ec' na' kaw eun yeuh mhai' eun nang awng' na'."‡ ¹³ Hot' seun' ku' tem' ri uin' ri nang htawm Seunga' na', "Leumeus' Ui' Yakop' eun, daecti Ui' ces ri E'saw' eun."§

¹⁴ Yeuh keutit' ko', e' ci' kaw lah' a yeuh sa'nhaw'? Peucawo' un' leupaws seumeu' Eun aw? Un' meuh. ¹⁵ Kopti lah' Eun a ri Mo'se eun, "Ui' sum' yeuh mun' ri a'nhaw' ko', yeuh Ui' a ri hkawn' eun.

* 9:7 9:7 Yamla 21:12 † 9:9 9:9 Yamla 18:10, 14 ‡ 9:12 9:12 Yamla 25:23 § 9:13 9:13 Malahki' 1:2, 3

Ui' sum' tulyak ri a'nhaw' ko', Ui' tulyak ri hkawn' eun.”*

¹⁶ Kop awn' na, ceu nang aen' ce a hkuin' meuh kopti hk'a' sum' pun mae' hk'a' co'ca' ri yeuh peue na'. Daecti meuh a kopti hk'a' tulyak Eun Peucawo' na'. ¹⁷ Kopti hk'a'nae htawm Seunga' na' Peucawo' lah' Eun a ri hkun'haw'hkam' Hparaw' eun, “Yuk Ui' mi yeuh mi keuting na' meuh a punta kaw Ui' yeuh ti'ca ri na' pucti lih neum mi ri mae' meuh a punta muis Ui' na' kaw a laws' heul' pang bhen' keute' na' hk'awp' na'.”† ¹⁸ Kop awn' na, Peucawo' Eun sum' tulyak ri a'nhaw' ko', Eun tulyak ri heun. Eun sum' yeuh a'nhaw' hpum' cen' ko', Eun ku yeuh hpum' eun hkawn' a cen'.

Hpum' seungeueng' mae' hpum' tulyak Eun Peucawo'

¹⁹ Pe' ri ngon' ti ri peue na' pe' cang mhaing' ui', “Yeuh keutit' ko', a ci' yeuh keunhaw' Peucawo' Eun vae' kawan' tang' map' ri e'? A'nhaw' ci' kaw cang ham'tap alo Eun na' pun?” ²⁰ Daecti peue na' pe', pe' ci' meuh a'nhaw' pe' vae' htu'hting' top' leukah' Eun Peucawo' na' pun? Ku' pun ri pleng' ri na' kaw a lah' a ri cawo' pleng' ri na' Eun, “A ci' yeuh keunhaw' mi vae' pleng' ui' yeuhki'”‡, meuh a ku' htuk' ri lah' aw? ²¹ Cawo' pleng' keutong' keute' na' eun, tuic' ti deng' na' un' kue' eun ahkvang kaw pleng' a meuh hk'eung chak' ngam kue' munhpung' na' mae' hk'eung lo' caee un' kue' munhpung' na' aw?

²² Seun' awn' na, Peucawo' Eun lawn sum' yeuh hk'a' seungeueng' ri na' mae' sum' kah ti'ca ri na' pucti lih glih'gleueng' ko', daecti Eun lawn yeun'hkam a pun peue ku' rangraen Eun ri uin' ri kaw yeuh ce lulaic na' ce ko', e' ci' kaw lah' a yeuh sa'nhaw'? ²³ Punta kaw Eun yeuh

* 9:15 9:15 Pucti heul' 33:19 † 9:17 9:17 Pucti heul' 9:16 ‡ 9:20 9:20 I'saya' 29:16; 45:9

munhpung' htonnuk ri na' pucti lih ri peue pun ri rap ri ti hk'a' tukyak Eun ri peue rangraen Eun ri uin' ce pun munhpung' ri tang' neum nanggal' na' Eun lawn yeuh keutit' ko', e' ci' kaw lah' a yeuh sa'nhaw'? ²⁴ Saec' meuh e' ri, e' ku meuh peue klawng Eun ri ti yeut. A hkuin' meuh pal peue ceu Yu'da na' ce koe, daecti a ku meuh peue un' meuh peue ceu Yu'da na' ce yeut. ²⁵ Seun' lah' Eun a hk'a' naee htawm Ho'se na',
 "Kaw Ui' klawng peue un' meuh peue ceu Ui' na' ce meuh 'peue ceu ri'.

Klawng peue un' leumeus' Ui' na' ce meuh 'peue leumeus' ri'."§

²⁶ maeé',

"Ceunang aen' ce a kaw keut' meuh teh' vang lah' Ui' a ri ce,

'Hpaw pe' ca' meuh peue ceu Ui' na'.

Ce kaw pun muis meuh ri, 'kon' Eun Peucawo' Cawo' a'yu im' na' Eun.' **

²⁷ I'saya' eun klawng ri lah' lawng ce peue ceu I'sarela' na'

yeuh keutit', "Peue ceu I'sarela' na' ce saec' heun' seun' sai keunam ka mha'seumut' na' ko', daecti ce vang yawo nang kaw pun ri rap hk'a' htut lawtpon na' peunaeng'.

²⁸ Kopti Peucawo' kaw Eun ti leukah' lah' ri na' hawc' ri bhen' keute' na' vaevae.'†

²⁹ A seun' ku' I'saya' lah' eun tang' neum nanggal' na' ko'. Eun lah',

"Peucawo' Cawo' ti'ca keuting na'

Eun lawn un' uin' un' vang ceucat pun e' ko', e' kaw pun ri lulaic heul' seun' veng So'dom na' maeé' seun' veng Gomorah na' ko'."‡

§ 9:25 9:25 Ho'se 2:23 * 9:26 9:26 Ho'se 1:10 † 9:28 9:28 I'saya' 10:22,

23 ‡ 9:29 9:29 I'saya' 1:9

Peue I'sarela' na' un' yum' ce

³⁰ Yeuh keutit' ko', e' ci' kaw lah' a yeuh sa'nhaw'? Saec' meuh peue un' meuh peue ceu Yu'da ku' un' hot' ri sok hk'a' leupaws seumeu' na', pun ce hk'a' leupaws seumeu' na' hawc'. Aen' a meuh hk'a' leupaws seumeu' ri hk'a' yum' na'. ³¹ Daecti saec' meuh peue I'sarela' ku' hot' ri sok leukah' ritroe ka hk'a' leupaws seumeu' na' ce hkuin' pun. ³² A ci' meuh kop keunhaw', ce vae' un' pun a? Meuh a kopti un' hot' ce ri sok a ri hk'a' yum' na'. Daecti ce yeuh a seun' kaw ri pun a ri ku' yeuh ri na'. Ce seuduih ri "seumu seuduih" na' ³³ hot' seun' ku' tem' a ri hk'a'nae htawm Seungá na',

"Keue' reu', uin' Uí seumu pang gong Yi'on na' ti meul'. A kaw yeuh peue seuduih ri ri ti.

A kaw yeuh ce htang'meul gawm'euc'.

Peue yum' Peucawo' Eun na' ce hkuin' kaw pun ri kaic."§

10

¹ Ec'awng' na' pe', ku' sum' is' uí nang hpum' ri na' mae' leukah' hk'o' uí mun' ri Peucawo' Eun pun peue I'sarela' na' ce na' meuh a kah ce pun hk'a' htut lawtpon na' gawm'euc' ri na'. ² Kopti hpum' huk' ce pun Peucawo' Eun na', uí kaw cang meuh sa' hki' ka pun. Daecti hpum' huk' ce aen' ce hkuin' yeuh a mae' yawng ri a. ³ Kopti un' yawng ce hk'a' leupaws seumeu' lih neum Peucawo' Eun na'. Ce sawng' yeuh hk'a' leupaws seumeu' ri na' meun. Kop awn' na, ce un' rap ri ti hk'a' leupaws seumeu' Eun Peucawo' na'. ⁴ Punta peue yum' na' kaw peue kue' hk'a' leupaws seumeu' na' ku peue ri, Hkrit Eun meuh vang tisut' ka leukah' ritroe na'.

⁵ Mo'se lah' eun lawng hk'a' leupaws seumeu' ka leukah' ritroe na' yeuhki', "A'nhaw' lawn yeuh ceu nang aen' ce

§ 9:33 9:33 I'saya' 8:14, 28:16

ko', kaw eun a'yu im' ri ceu nang aen' ce."* 6 Daecti eun lah' lawng hk'a' leupaws seumeu' ka hk'a' yum' na' yeuhki', "Pawlaee kuit a yeuh keutit' nang hpum' ri, 'A'nhaw' ci' kaw huk' nang kuing' pang mao' na'?" † (A meuh klawng Hkrit Eun lih na'.) 7 "A'ko', 'A'nhaw' ci' kaw lih vang rui' na'?" ‡ (A meuh klawng Hkrit Eun kuh' huk' hk'ai' hk'a' yeum ri na'.) 8 Daecti hk'a' leupaws seumeu' na' a ci' lah' ri yeuh sa'nhaw'? A lah', "Leukah' aen' ut' a keunam pe', a ut' ri moeng mae' ut' ri hpum' pe' na'."§ A meuh leukah' hk'a' yum' buih pao' e' na' yeut. 9 Aen' na ko', moeng pe' na' a lawn rap ri ti Yesu' meuh Eun Peucawo' na' mae' hpum' pe' na' a yum' Peucawo' yeuh Eun Yesu' Eun tang kuh' im' hk'ai' vang yeum ri na' ko', pe' ku kaw pun ri rap ri ti hk'a' htut lawtpon na' yeut. 10 Kopti meuh a yum' pe' ri hpum' ri na', Eun sawn' pe' meuh peue leupaws seumeu'. Mae' kopti meuh a rap pe' ri ti ri moeng ri na', Eun yeuh pe' lawtpon. 11 Hot' seun' ku' lah' ka nang htawm Seunga' na', "Peue yum' hk'a'naee Heun na', peue hkuin' kaw pun ri rap ri ti hk'a' hk'o'kaic na'."* 12 Kopti peue ceu Yu'da, a'ko' peue un' meuh peue ceu Yu'da na' un' chat ce puri. Peucawo' ti ton' yawo na' meuh Eun Peucawo' ce peue gawm'euc' na'. Eun nap mun' htonnuk ri na' ri peue klawng Eun na' ce gawm'euc'. 13 Kopti, peue klawng muis Eun Peucawo' na' peue gawm'euc', kaw ce pun ri rap ri ti hk'a' htut lawtpon na'.†

14 Daecti peue un' nang yum' na', ce ci' kaw cang klawng Eun yeuh sa'nhaw'? Peue un' nang duing mhawng' lawng Eun na', ce ci' kaw cang yum' yeuh sa'nhaw'? A lawn un' kue' peue heul' lah' ce mhawng' lawng Eun na' ko', ce ci'

* 10:5 10:5 Fae' 18:5 † 10:6 10:6 Sawn' leukah' mun' 30:12 ‡ 10:7 10:7 Sawn' leukah' mun' 30:13 § 10:8 10:8 Sawn' leukah' mun' 30:14 * 10:11 10:11 I'saya' 28:16 † 10:13 10:13 Yaw'la' 2:32

kaw pun ri mhawng' a yeuh sa'nhaw'? ¹⁵ A lawn un' kue' peue cus' ri heul' ko', a'nhaw' ci' kaw cang heul' lah' a yeuh sa'nhaw'? Hot' seun' ku' tem' a ri hk'a'naee htawm Seunga' na', "Cung ce peue ti leukah' mun' ren'kawn ing' na', a ci' pe hk'o'nawk a'neng?"[‡]

¹⁶ Daecti a hkuin' caee ri meuh peue I'sarela' na' kaw ce yawm' ri rap ri ti leukah' mun' ren'kawn na' gawm'euc' ri. Kopti I'saya' lah' eun ri uin' a, "Cawo', a'nhaw' ci' kaw yum' leukah' e' na'?"[§] ¹⁷ Kop awn' na, hk'a'yum' na' ing' a neum pun ri mhawng' lawng ka na'. Lawng pun ri mhawng' na' a meuh leukah' Eun Hkrit na'. ¹⁸ Daecti ui' cheu ri mhaing' ri nawk, "Un' pun ce ri mhawng' a aw?" Pun ce ri mhawng' a neum yeut seun' lah' a ri hk'a'naee htawm Seunga' na'. "Seng' ce na' puc a ri heul' hk'awp' bhen' keute' na'.

Leukah' ce na' a heul' rot ri vang sut' ka bhen' keute' na'."^{*}

¹⁹ Ui' cheu ri tang mhaing' bae ti pok, "Peue I'sarela' na' un' leuceng pun ce a aw?" Mo'se lah' eun a tang' neum nanggal' na', "Ui' kaw yeuh pe' mang' peue un' meuh peue ceu Yu'da na' ce. Ui' kaw yeuh pe' seungeueng' ri cu ui' peue nga' suisa na' ce."[†]

²⁰ I'saya' eun hpum' hat'han' lah' a ri peue un' meuh peue ceu Yu'da na' ce, "Peue un' hot' ri sok ui' na', nyu ce ui'.

Tuh' ui' peue un' hot' ri mhaing' sok ui' na', ce nyu ri."[‡]

²¹ Daecti eun lah' lawng ce peue I'sarela' na' yeuhki', "Nyat' ui' ti' ri na' gawm' seunyi

[‡] 10:15 10:15 I'saya' 52:7 § 10:16 10:16 I'saya' 53:1 * 10:18 10:18
Suk'seun' 19:4 † 10:19 10:19 Saw'n leukah' mun' 32:21 ‡ 10:20 10:20
I'saya' 65:1

ri peue un' leuceng hpum' cen' na' ce.”§

11

Peue I'sarela' kawn' vang na' ce

¹ Yeuh keutit' ko' kaw ui' mhaing', “Peucawo' tecla Eun peue ceu ri na' ce hawc' aw?” Un' meuh, Saec' ui' ri, ui' ku meuh peue I'sarela' ceucat eun Abraham neum kon'hk'i eun Benyamin. ² Peucawo' Eun hkuin' tecla peue ceu ri ku' leuk Eun ri uin' tang' neum nanggal' na' ce. Un' yawng pe' ton htawm Seunga' lawng ku' E'li'ya tang' eun peue I'sarela' na' ce ri Peucawo' Eun na' aw? Eun lah', ³ “Cawo', toh ce peue suip leukah' Mi na' ce. Ce lhu' ri tec vang dum ri tan Mi na'. A vang yawo ui' ri koe. Ce ku buih co'ca' ri sok ri kaw toh ui' yeut.”* ⁴ Daecti Peucawo' Eun ci' top' a ri heun yeuh sa'nhaw'? Eun lah', “Leuk Ui' ri uin' peue un' seukluin ri fae' ruphtu Bala' a' res heng' peue na' ce meuh punta Ui'.”† ⁵ Seun' awn' na saec' meuh yam maet'maen' na', a ku kawn' kue' peue Peucawo' cu Eun mun' ri Eun leuk ri uin' na' ce yeut. ⁶ Eun lawn cu mun' ri na' leuk a ko', hpaw a ca' laee meuh kopti hk'a' yeuh a na'. Kopti a lawn meuh kopti hk'a' yeuh na' ko', mun' na' hpaw a ca' kaw laee meuh mun'.

⁷ Yeuh keutit' ko', yeuh sa'nhaw'? Peue I'sarela' na' ce hkuin' pun hk'a' leupaws seumeu' ku' hot' ce ri sok na'. Daecti peue Peucawo' leuk Eun ri ti na' ce pun a. Nang seubu lheu' hkaen' ce na' ce hpum' cen'. ⁸ Hot' seun' ku' tem' a ri hk'a'naee htawm Seunga' na', “Peucawo' Eun tuil' ce is' hpum' kuit kvai,
ngai' un' cang nyu
maee' yhuk' un' cang mhawng' na'

§ 10:21 10:21 I'saya' 65:2 * 11:3 11:3 1 Hkun'haw'hkam' 19:10,14

† 11:4 11:4 1 Hkun'haw'hkam' 19:18

rot seunyaen'."‡

⁹ Davit' eun ku lah',

"Kah hpuin' som' ce na' meuh hk'ai mae' sae'pan,
meuh seumu vang seuduih ri htang' meul na' mae'
meuh hk'a' ciyang pun ce na' reu'.

¹⁰ Punta kaw ce un' cang nyu na', kah ngai' ce na'
duim'lawng heul'.

Kah pang kui' ce na' gaw' cot'cu ce."§

Peue ceu seubu na' pun ce hk'a' htut lawtpon

¹¹ Kaw ui' mhaing' bae, peue I'sarela' na' htang' meul
ce a hk'o' ce un' laee cang kuh' aw? A hkuin' meuh. Daecti
kopti yeuh ce ku' kleuc' na', punta Peucawo' kaw Eun yeuh
peue I'sarela' na' ce hko'e mang' na', hk'a' htut lawtpon na'
a ing' rot ri peue un' meuh peue ceu Yu'da na' ce. ¹² Daecti
ku' kleuc' yeuh ce na' a lawn na' meuh hk'a' htonnuk pun
bhen' keute' na' gawm'euc' ko', mae' ku' pun ce ri sum na'
a lawn na' meuh hk'a' htonnuk pun peue un' meuh peue
ceu Yu'da na' ce ko', hk'a' htonnuk ce peue I'sarela' na' a
ci' na' pe gawm ti hk'a' htonnuk lheu' awn' a ing' a' neng?

¹³ Buih leukah' ui' mae' peue un' meuh peue ceu Yu'da
na' pe'. Meuh ui' peue caee Eun Yesu' pun peue un' meuh
peue ceu Yu'da na' pe'. Ui' sawn' kan' ri aen' a kue' a' ye'
keuting. ¹⁴ Keutui' hpum' ui' ri kaw yeuh peue ceu ui' na'
ce mang' pe' mae' ui' kaw teum'kawm ce ngon' ce na' pun
ri lawtpon na'. ¹⁵ Kopti hk'a' Peucawo' tecla Eun ce na' a
lawn na' yeuh bhen' keute' na' tang htuk'lung Peucawo'
Eun ko', hk'a' Peucawo' tang rap Eun ri ti ce bae na' a jaen
na' chak' nyawk'. Awn' a meuh hk'a' tang kuh' im' hk'ai'
vang yeum na'. ¹⁶ Hkawomun' tan ri ri Peucawo' Eun ti
deng' aet' na' a lawn seung' chak' ko', deng' keuting ka

‡ 11:8 11:8 Sawn' leukah' mun' 29:4; I'saya' 29:10 § 11:10 11:10 Suk'seun'
69:22, 23

na' a ku na' seungá chak' euc'. Res ka na' a lawn seungá chak' ko', kak' ka na' ce a ku na' seungá chak' yeut.

¹⁷ Kak' ka sanlon na' pun a ri taws' ri tec ri ngon', hawc' ko' a ti kak' ka sanlon hk'i na' pe' ing' kap' to' a tang' ku' taws' ri tec ri na' ce. Pe' tawl' pun ri hk'a ku' hk'a neum res ka kleum' sanlon na'. ¹⁸ Kop awn' na, pe' na' pawlaee hpum' keuting hk'a pang kak' pun ri taws' ri na' ce. Pe' lawn hpum' keuting ko', yeuh pe' pawn a, hpaw pe' ca' kawm ri yuk res na', daecti res na' kawm a ri yuk pe' ri. ¹⁹ Hawc' ko', na' pe' cang lah' a yeuh keutit', "Punta kaw ye pun ri kap' to' ri ri kleum' na', kak' awn' ce pun ri taws' ri tec ri." ²⁰ Cawp' ka yeut, pun ce ri taws' ri tec ri na' meuh a kopti un' yum' ce na'. Daecti pun pe' ri ut' na' meuh a kopti yum' pe' na'. Pawlaee hpum' keuting, daecti lhat' reu'. ²¹ Kopti Peucawo' Eun lawn un' uin' kak' hk'im' na' ko', Eun ku kaw un' uin' pe' ri yeut.

²² Kop awn' na, kuit ri mhawng' hk'a' tukyak Eun Peucawo' na' gawm' hk'a' reng Eun na' reu'. Eun yeuh reng ri peue htang' meul na' ce, daecti pe' lawn ut' hk'a' naee hk'a' tukyak Eun na' ko', Eun ku kaw tukyak ri pe'. A lawn un' yeuh keutit' ko', Eun na' taws' ri tec pe' yeut. ²³ Peue I'sarela' na' ce lawn tang ing' yum' Peucawo' Eun bae ko', Peucawo' Eun kaw ti ce ing' kap' to' ri ri kleum' na'. Kopti Peucawo' cang ti Eun ce ing' kap' to' ce ri kleum' na' bae. ²⁴ Vang tisut' ka na', pe' saec' na' pun ri taws' ri neum kleum' ka sanlon hk'i na' pe' na' kap' to' ri mae' kleum' ka sanlon yung' na' pun ko', kak' ka sanlon yung' na' a tang ing' kap' to' ri ri kleum' hk'im' ri na' ko', a ci' na' pe sam' ran a' neng?

Peue I'sarela' na' kaw ce lawtpon gawm' euc'

²⁵ Ec' awng' na' pe', punta kaw pe' un' hpum' keuting mae' tu' ri meun na', ui' sum' kah pe' leuceng pun ku'

vangdoh' rui' aen' a. Aen' a meuh peue I'sarela' na' ngon' kaw ce hpum' cen' rot ti peue un' meuh peue ceu Yu'da na' kaw ce ing' lec nuk ca'lang' ri na'. ²⁶ Yam awn' na, peue I'sarela' na' ce kaw pun hk'a' htut lawtpon na' gawm'euc' ri hot' seun' ku' tem' a ri hk'a'naee htawm Seunga' na', a lah'

“Cawo' htut na' kaw Eun pucti lih neum gong Yi'on na'.

Eun kaw ti ri tec ku' rai na' hk'ai' ceucat eun Yakop' na' ce.

²⁷ Aen' a meuh kati sat'ca' yeuh Ui' ri ce yam ti Ui' ri tec map' ce na'.”*

²⁸ A lawn meuh hk'a' leukah' mun' ren'kawn na' ko', punta kaw pe' pun mun' na', meuh ce ransu Eun Peucawo'. A lawn meuh hk'a' leuk ri ti na' ko', kopti meuh a a'ta' keuting ce na' ce, ce meuh peue Peucawo' leumeus' Eun ce.

²⁹ Kopti lapsawng' Eun Peucawo' na' mae' hk'a' klawng Eun ri ti na' un' laee leuploh' plin' a ri. ³⁰ Seun' a saec' pe' ri tawn un' leuceng pe' Peucawo' Eun nanggal' aen' a na', maet'maen' pe' pun hk'a' tukyak Eun na' kopti meuh a hk'a' un' leuceng ce na'. ³¹ Seun' awn' na, saec' meuh ce ri maet'maen', ce hkuin' yum'. Aen' a meuh punta kaw ce pun hk'a' tukyak na' kopti Peucawo' tukyak Eun ri pe' na'.

³² Kopti Peucawo' ta' Eun peue un' leuceng leukah' ri na' a meuh punta kaw Eun tukyak ri peue gawm'euc' na'.

Cai suk'seun'

³³ O', peuyha' cu'yi meuneum Eun Peucawo' na' mae' hk'a' cang yawng Eun na' rui' nyawk' ka.

Hk'a' caet ri nawk mae' hk'a' keutec ri nawk Eun na' un' cang kuitdoh' ri ka.

Hk'a' Eun na' un' cang sok ri nyu a.

³⁴ “A'nhaw' ci' kaw cang yawng hpum' Eun Peucawo' na'?

* 11:27 11:27 I'saya' 59:20, 21; 27:9; Yeramí' 31:33, 34

- A'ko', a'nhaw' cí meuh nang tuil' kamkuit Eun na'?"†
- 35 "A'nhaw' cí duing tuil' ku' ti ri ceu ri Peucawo' Eun,
Peucawo' Eun kaw kah ri sai' a?"‡
- 36 Kopti ku ceu na' lih a neum Heun. Eun yeuh a, a meuh
pun Heun.
Kah munhpung' na' kue' ri Heun cot'cu ri reu'. Amin.

12

Ku' tan a'yu im'

¹ Kop awn' na ec'awng' na' pe', yam kuit e' ri nawk hk'a' tukyak Eun Peucawo' na', uí hk'o' pe' tan tu' pe' na' meun ri Peucawo' Eun meuh ku' tan a'yu im' seunga' chak' ku' hit' hpum' Eun Peucawo' na'. Aen' a meuh hk'a' faee' ri civit pe' na'. ² Pawlaee a'yu im' hot' seun' peue bhen' keute' cu maet'maen' na' ce, daecti rap ri ti hk'a' leuploh' civit hpum' ri hk'u' na'. Yeuh keutit' ko', pe' kaw cang caet ri nawk htawhkam ceu nangnhaw' na' a cí meuh alo Eun Peucawo' na'. Pe' kaw cang yawng keunhaw' na' chak' ka, keunhaw' na' htuk' a hpum' Eun, keunhaw' na' a cí chak' nyawk' hk'ai' peue.

Lapsawng' tuil' Eun Peucawo'

³ Kopti meuh a mun' tuil' ri ri uí na', uí hk'o' ri lah' a ri pe' ku peue, pawlaee sawng' hteum' pe' keuting lheu' ku' buih meuh pe' na'. Daecti hk'a'naee kue' pe' sati na', sawng' kuit yawo pal htan Peucawo' tuil' Eun ri pe' na' reu'. ⁴ E' ri ku peue, jawngkui' tu' e' na' meuh a keuhti yawo, daecti hk'eung hk'a'naee ka na' a kue' heun' ceu. Kan' ka hk'eung awn' ce, a hkuin' seun' puri. ⁵ Seun' awn' na ko', hk'a'naee Hkrit Eun e' saec' na' meuh heun' peue ko', e' hk'on' ri meuh yawo jawngkui' tu' keuhti, daecti hk'eung na' keuhti hawc' keuhti a meuh is' puri

† 11:34 11:34 I'saya' 40:13 ‡ 11:35 11:35 Yaw'ba' 41:11

gawm'euc'. ⁶ E' ri ti peue hawc' ti peue, e' kue' lapsawng' Peucawo' tuil' Eun ri e' hot' mun' tuil' Eun ri e' na' a hkuin' seun' puri. A'nhaw' lawn pun lapsawng' suip ri lah' leukah' Eun Peucawo' na' ko', kah eun lo' lapsawng' aen' a hot' kawlr'eng ka hk'a' yum' kue' eun na' reu'. ⁷ A'nhaw' lawn pun lapsawng' yeuh mhai' na' ko', kah eun yeuh mhai' na' reu'. A'nhaw' lawn pun lapsawng' hk'a' sangsawn' na' ko', kah eun sangsawn' reu'. ⁸ A'nhaw' lawn pun lapsawng' tuil' kawlr'eng na' ko', kah eun tuil' kawlr'eng reu'. A'nhaw' lawn pun lapsawng' hk'a' teum'kawm ku' lo' peue na' ko', kah eun tuil' ri hk'a'naee hpum' vah ri na' reu'. A'nhaw' lawn pun lapsawng' meuh ro'kan na' ko', kah eun seue' hpum' ri u'peung reu'. A'nhaw' lawn pun lapsawng' tuh' hk'a' tuckyak ri peue na' ko', kah eun ren'kawn yeuh a reu'.

Hk'a' leumeus'keus

⁹ Leumeus' sut' hpum' ri reu'. Jeuk ku' rai na' reu'. Jhawp' ku' chak' na' reu'. ¹⁰ Leumeus' puri seun' ec'awng' reu'. Tuil' puri is' munhpung' hk'a'naee sawn' peue chak' lheu' mi ri na' reu'. ¹¹ Pawlaee va hpum' huk' ri na' yop, daecti roksa' hpum' huk' ri hk'a' civit pe' na' yeuh kan' Eun Peucawo' na' reu'. ¹² Ren'kawn hk'a'naee vang keutui' hpum' na' reu'. Yeun'hkam hk'a' tukhka na' reu'. Kati keutawn' hk'a'naee hk'o' mun' na' reu'. ¹³ Gvah ri tuil' ri peue Eun Peucawo' ku' cuthkuin' na' ce reu'. Yeuh ri kue' hpum' vahveung rap ri ti chec'leu na' ce reu'.

¹⁴ Nap mun' ri peue keunhap' nokneh pe' na' ce reu'. Nap mun', pawlaee jha'. Nap mun' palkoe reu'. ¹⁵ Ren'kawn mae' peue ren'kawn na' ce reu'. Kuit nyhap' mae' peue kuit nyhap' na' ce reu'. ¹⁶ Yeuh hpum' ri meuh ti meul' ut' tiduih' reu'. Pawlaee va ri kue' hpum' lhung' hpum' keuting na', daecti yeuh a'mawo mae' peue htan

tem un' kue' munhpung' na' ce reu'. Pawlaee mhawng' ri hk'o'cuin.

¹⁷ Pawlaee yeuh ri top' ku' rai na' ri peue yeuh ku' rai ri pe' na' ce. Peus hpum' ri yeuh ku' nyu peue meuh ku' chak' ku' cawp' na' reu'. ¹⁸ A lawn kaw cang ko', ut' a ri pe' yawo, yeuh ri ut' cumyen' tiduih' reu'. ¹⁹ A'mawo na' pe', ku' kleuc' yeuh peue ri pe' na', pawlaee yeuh ri top' a. Daecti tae' Peucawo' Eun yeuh hk'a' seungeueng' ri na' pucti lih reu'. Kopti Peucawo' lah' Eun a hk'a' naee htawm Seunga' na', "Yeuh ri top' na' meuh a kan' Ui', Ui' kaw yeuh ri top' a."* ²⁰ Nang htawm Seunga' ton seubu na' a lah', "Ransu mi na' eun lawn sum' som' ko', tuil' eun som' reu'.

Eun lawn sum' nyui leuum' ko', tuil' eun nyui reu'.
Yeuh keutit' na' ko', mi kaw bae guh ngawl ha' pang cing' eun na'."†

²¹ Pawlaee va ku' rai na' pe pe', daecti yeuh ku' chak' na' pe ku' rai na' reu'.

13

Yawm' ri ut' hk'a'ruim ce cawo' u'peung na'

¹ Yawm' ri ut' hk'a'ruim ce cawo' kue' an'nya u'peung na' ce ku peue ri, kopti a lawn un' meuh an'nya Peucawo' tang' Eun ri uin' na' ko', a'nhaw' hkuin' kue' an'nya na' saec' ti peue. Peue kue' an'nya na' meuh ce ku' Peucawo' tang' Eun ri uin'. ² Kop awn' na, peue fuin cawo' kue' an'nya na' eun ko', eun ku buih fuin ku' yeuh Eun Peucawo' na' yeut. Peue yeuh keutit' na' eun ko', kaw eun ti hk'a' taws' a'mu na' ing' ri ti meun. ³ Kopti cawo' u'peung kuing' na' hpaw ce ca' meuh ku' hk'o'lhat' pun peue yeuh ku' cawp' na' ce. Daecti ce hk'o'lhat' pun peue yeuh ku' kleuc' na' ce. Sum' pon pe' hk'a' lhat' ri peue kue' an'nya na'

* 12:19 12:19 Saw'n leukah' mun' 32:35 † 12:20 12:20 Leukah' rui' 25:21,

ce aw? Yeuh keutit' ko', yeuh ku' cawp' na' reu', kaw ce suk'seun' pe'. ⁴ Kopti punta kaw pe' ut' sam'ran na', ce meuh mhai' Eun Peucawo'. Daecti pe' lawn yeuh ku' kleuc' na' ko', lhat' reu'. Kopti hpaw ce ca' jhawp' leungawng na' hk'o'hk'awng'. Meuh ce mhai' Eun Peucawo'. Ce ti hk'a' ciyang Eun Peucawo' na' lih ri peue yeuh ku' kleuc' na' ce. ⁵ Kop awn' na, pe' kaw kah ri yawm' ri ut' hk'a' ruim ce peue kue' an'nya na'. A hkuin' meuh kopti lhat' ri hk'a' ciyang na' palkoe, daecti a ku meuh kopti hpum' cang yawng pe' na' yeut.

⁶ Kopti meuh a aen' a na', pe' seue' hkawn' ka, kopti peue kue' an'nya na' meuh ce mhai' Eun Peucawo' na'. Ce yeuh kan' u'peung kuing' na'. ⁷ Sai' ku' ma ma pe' ri peue ku peue na' ce reu'. Pe' lawn un' nang seue' hkawn' na' ko', seue' a reu'. Peue kuing' ri yumyam' na', yumyam' ri ce reu'. Peue kuing' ri pun munhpung' na', tuil' munhpung' ce reu'.

Leumeus' puri kopti seunyi awn' kaw a hk'aws' rot hawc'

⁸ A lawn un' meuh yawo hk'a' leumeus'keus puri na' ko', pawlaee va ri kue' ku' ma ri a'nhaw' saec' ti peue. Kopti a'nhaw' lawn leumeus' peue ut' keunam caonao' ri na' ce ko', yeuh eun leukah' ritroe na' htonnuk hawc'. ⁹ Leukah' ritroe ku' lah', "Pawlaee len'cu, pawlaee toh peue, pawlaee rabawk' peue, pawlaee se'dai' is' peue"* na', mae' leukah' ritroe seubu na' ce ku ut' hk'a'naee leukah' ritroe aen' a hawc'. A meuh, "Leumeus' peue ut' keunam caonao' mi na' ce seun' leumeus' mi tu' ri na' meun yeut reu'."† ¹⁰ Hk'a' leumeus'keus na' hpaw a ca' yeuh peue ut' keunam caonao' na' ce sui'. Kop awn' na, peue kue' hk'a' leumeus'keus na' pun eun ri yeuh leukah' ritroe na' htonnuk hawc'.

* **13:9** 13:9 Pucti heul' 20:13-15, 17; Saw'n leukah' mun' 5:17-19, 21 † **13:9** 13:9 Fae'e 19:18

¹¹ Yeuh ceu nang aen' ce ri yawng pé' yam maet'maen' na' a ci' meuh yam keunhaw' na' reu'. Rot a yam kaw pé' hk'awn' hk'ai' it' ri na' hawc', kopti maet'maen' hk'a' htut lawtpon na' gawm baet a ri de e' hk'ai' yamla e' ri yum' na' hawc'. ¹² Yam peunsum' na' kaw a hk'aws' euc', a kaw hk'aws' rot yam peunnyi na' hawc'. Kop awn' na, kah e' hpuic' ri tec ku' yeuh ka hk'a' duim'lawng na', cuip' hk'eung an'nya ka ku' ceng' na' pawh. ¹³ Kah e' yeuh ku' kuing'hpaw mae' ut' e' hk'a'nae' yam ka peunnyi na', pawlaee yeuh ku' ren'kawn pon lheu', pawlaee yuic' ri plai', pawlaee yeuh ri hkuit'nawng'tang', pawlaee kleuc' leumeul puri, pawlaee gvah muk gvah cum puri mae' pawlaee hkoemang' puri. ¹⁴ Daecti, yong' tu' pé' na' ri Cawo' Yesu' Hkrit Eun reu'. Punta kaw pé' yeuh ri htonnuk ri hk'a' ta'nha' ka hk'a' nham' keune na' yeuh sa'nhaw' na', pawlaee kuit a.

14

Peue kaw'ring kloe mae' kaw'ring keuting

¹ Rap ri ti peue kaw'ring kloe hk'a'nae' hk'a' yum' na' ce reu'. Pawlaee taws' a'mu ri ce ri lawng kamkuit un' seun' puri na'. ² Ngon' ti ri peue yum' eun ku' hk'a' na' cang hk'a' a ri ku ceu. Daecti peue hk'a' yum' kaw'ring kloe na' eun hk'a' yawo pal tui' lha'. ³ Peue hk'a' ku' hk'a' ku ceu na' eun, pawlaee ri hkamram ku' un' hk'a' na' eun. Ku' un' hk'a' na' eun, pawlaee tang' map' ri ku' hk'a' na' eun. Kopti Peucawo' rap Eun ri ti ka hawc'. ⁴ Mi ci' meuh a'nhaw', mi vae' taws' a'mu ri mhai' eun peue seubu na' eun. Hkawn' eun saec' pun ku' chak' na' un' lah', lulaic heul' na' un' lah', ut' a ri Cawo' eun na' Eun. Kopti Peucawo' cang yeuh Eun eun pun ku' chak' na', eun kaw pun a neumneum.

⁵ Ngon' ti ri peue eun tang' seunyi ti ri seunyi na' keuting hk'ai' seunyi seubu na'. Daecti ku' seubu ti peue

na' eun sawn' seunyi ku seunyi na' seun' puri. Pe' ri ku peue, sawng'sawng' jhawp' kamkuit pe' na' meun reu'.
⁶ A'nhaw' lawn tang' seunyi ti ri seunyi na' keuting hk'ai' seunyi seubu na' ko', tang' eun a punta tuil' munhpung' ri Peucawo' Eun. A'nhaw' lawn hk'a keune ko', hk'a eun a punta tuil' munhpung' ri Peucawo' Eun kopti mun' keuting eun ri Peucawo' Eun na'. Peue un' hk'a na' eun ko', un' hk'a eun a punta tuil' munhpung' ri Peucawo' Eun. Eun mun' keuting ri Peucawo' Eun. ⁷ Kopti hpaw e' ca' kue' nang a'yu im' pun yawo tu' ri meun palkoe na' saec' ti peue. E' ku hkuin' kue' nang yeum pun yawo tu' ri meun palkoe na' saec' ti peue yeut. ⁸ E' saec' a'yu im', e' ku a'yu im' pun Peucawo' Eun. E' saec' yeum, e' ku yeum pun Peucawo' Eun. Kop awn' na, e' saec' na' im', e' saec' na' yeum, meuh e' is' Eun Peucawo'.

⁹ Kopti meuh a ceu nang aen' a na', punta kaw Eun meuh Peucawo' ce peue yeum mae' peue im' na', Hkrit Eun yeum, Eun tang kuh' im'. ¹⁰ Yeuh a keutit' na', kopti kaw e' kah ri cawng nanggal' ka ten taws' a'mu Eun Peucawo' na' gawm'euc' e'. A ci' meuh kop keunhaw' pe' vae' taws' a'mu ri ec'awng' ri na' ce? A ci' meuh kop keunhaw' pe' vae' ri hkamram ec'awng' ri na' ce? ¹¹ Hot' seun' ku' tem' a ri nang htawm Seungá na',

“Cawo' Peucawo' Eun lah', 'Seun' a'yu im' Ui' neumneum na',
 peue na' kaw peue seukluin ri nanggal' Ui' ku peue,
 dak' na' a kaw lah' hk'a' taws' hpum' na' ri Peucawo'
 Eun ku dak'.”*

¹² Kop awn' na, e' kaw pun ri lah' lawng tu' meun ri na' ri Peucawo' Eun.

¹³ Kop awn' na, pawlaee taws' a'mu ri puri. Daecti htuk' e' ri kuit a deut hpaw e' ca' kaw laee yeuh ku' kaw

* 14:11 14:11 I'saya' 45:23

yeuh ec'awng' na' ce seuduih leuveul' ri na' mae' un' laee va ri yeuh ku' kang' hk'a' ce na', a jaen na' chak'.
¹⁴ Ku' yawng uí neumneum hk'a'naee Cawo' Yesu' Eun na' ko', taengtaeng ku' hk'a' na' meun ko' ca' kue' a ku' un' seunga' chak'. Daecti a'nhaw' lawn sawn' ceu nangnhaw' na' un' seunga' chak' ko', ceu nang awn' a ku' meuh ku' un' seunga' chak' pun heun. ¹⁵ Kopti ec'awng' pe' na' ce lawn hpum' un' sam'ran kopti meuh a ku' hk'a' pe' na' ko', pe' ku' hkuin' laee suip ri hot' ri yeuh hk'a' ka hk'a' leumeus'keus na'. Pawlaee kah ku' hk'a' pe' na' yeuh ec'awng' ku' Hkrit pun Eun ri yeum pun ce na' ce lulaic reu'. ¹⁶ Pawlaee kah peue lah' ku' kuit mi chak' na' meuh ku' rai. ¹⁷ Kopti kuing' Eun Peucawo' na' hpaw a ca' meuh lawng ku' nyui ku' hk'a', daecti a meuh hk'a' leupaws seumeu', hk'a' kuit nyawk' kuit sam'ran cumyen' mae' hk'a' ren'kawn hk'a'naee Cit' seunga' chak' na'. ¹⁸ A'nhaw' lawn yeuh mhai' Eun Hkrit hk'a'naee ceu nang aen' ce ko', hit' eun hpum' Eun Peucawo'. Eun ku' hit' hpum' peue yeut.

¹⁹ Kop awn' na, kah e' yeuh ku' kaw yeuh e' ut' sam'ran cumyen' na' ri puri mae' kah e' yeuh ri huk'hawn' hk'a'naee hk'a' yum' na' ri puri reu'. ²⁰ Pawlaee yeuh kan' Eun Peucawo' na' lulaic kopti meuh a ku' hk'a' na'. Meuh ka neum, ku' hk'a' na' hpaw a ca' to' ri un' chak', daecti a'nhaw' lawn yeuh peue seubu na' peue yeuh ku' kleuc' ri kop ku' hk'a' ri na' ko', hkawn' eun ku' kue' hk'a' kleuc' yeut. ²¹ Kopti meuh a hk'a' e' keune, a'ko' nyui e' plai', a'ko' yeuh e' ku' ti ri ceu a yeuh ec'awng' e' na' ce seuduih leuveul' ri ko', ceu nang aen' ce un' mak' ri yeuh a, a jaen na' chak'.

²² Ku' yum' mi lawng ceu nang aen' ce na' rokxa' a nang seuna' pa' Peucawo' na' reu'. Peue un' tang' map' ri ti meun ri lawng ku' htawhkam eun meuh ku' cawp' hawc' na', kah eun pun mun'. ²³ A'nhaw' lawn kawn' kue' hk'a' kangkae

eun hk'a ko', eun ku kue' hk'a kleuc' kopti un' hk'a eun a hot' hk'a yum' ri na'. Saec' na' yeuh ceu nangnhaw' na', a lawn un' yeuh ri lih neum hk'a yum' na' ko', meuh a map' gawm'euc' ri.

15

¹ Peue kue' hk'a yum' kaw' reng keuting na' e', htuk' e' ri yeun' hkam ri peue kue' hk'a yum' kaw' reng aet' na' ce. E' htuk' ri un' hot' ri yeuh ku' htuk' hpum' ri na' meun. ² E' ri ku peue, yeuh ku' hit' hpum' ce peue ut' keunam caona' na' ce reu', punta kaw a kue' mun' pun ce na', ce na' go' ri huk' hk'a' naee hk'a' yum' na'. ³ Kopti saec' meuh Hkrit Eun, Eun ku un' yeuh ku' htuk' hpum' ri na'. Hot' seun' ku' tem' a ri nang htawm Seunga' na', "Leukah' un' nawpsang ce peue un' nawpsang Mi na' rot a hk'a' pang ui'."* ⁴ Kopti punta kaw e' kue' hk'a' keutui' hpum' ri hk'a' yeun' hkam na' mae' ri hk'a' tuil' kaw' reng neum htawm Seunga' na', leukah' tem' ri yam pon heul' hawc' na' a tem' ri punta kaw a sangsawn' e'.

⁵ Hk'o' Peucawo' Cawo' tuil' hk'a' yeun' hkam na' mae' hk'a' kaw' reng na' Eun, kah Eun yeuh pe' hot' Yesu' Hkrit Eun ri meuh pe' hpum' ti meul' na' reu'. ⁶ A meuh punta kaw pe' pun ri tuil' munhpung' ri Peucawo' na' Eun ri moeng mae' ri hpum' ti meul' pe' na'. Eun meuh kuiing' Eun Yesu' Hkrit Cawo' Peucawo' e' na' Eun.

⁷ Kop awn' na, punta Peucawo' kaw Eun pun munhpung' ri na', kah pe' rap ri ti pu ri ti peue hawc' ti peue seun' Hkrit rap Eun ri ti pe' na' reu'. ⁸ Kopti ui' lah' a ri pe', Hkrit lih Eun seun' meuh ri mhai' ce peue ceu Yu'da na' punta kaw Eun yeuh e' nyu hk'a' keutawn' ka kati Eun Peucawo' ku' Peucawo' yeuh Eun ri a'ta' keuting ce ⁹ punta peue un' meuh peue ceu Yu'da na' kaw ce tuil' munhpung'

* 15:3 15:3 Suk'seun' 69:9

ri Peucawo' Eun kopti meuh a hk'a' tukyak Eun na'. Hot' seun' ku' tem' a ri nang htawm Seungá na',
 “Kop awn' na, uí kaw suk'seun' Mi nang ngon' ce peue un' meuh peue ceu Yu'da na'.

Uí kaw cai suk'seun' muis Mi na'.”†

¹⁰ Ku' seubu ti ton na' a lah',
 “Peue un' meuh peue ceu Yu'da na' pe', ren'kawn maeé' peue Eun Peucawo' na' ce tiduih' reu'.”‡

¹¹ Ku' seubu ti ton na' a ku lah',
 “Peue un' meuh peue ceu Yu'da na' pe', suk'seun' Peucawo' Eun reu'.

Peue ceu gawm'euc' na' pe', cai suk'seun' Eun reu'.”§

¹² I'saya' eun ku lah',
 “Res eun Yesae' na' a kaw pucti lih,
 Eun kaw pucti lih punta kaw Eun u'peung peue ceu gawm'euc' na',
 peue un' meuh peue ceu Yu'da na' ce kaw kue' hk'a' keutuí' hpum' hk'a'naee Heun.”*

¹³ Punta kaw pe' htonnuk ri hk'a' keutuí' hpum' ri tí'ca ka Cit' seungá chak' na', kah Peucawo' Cawo' keutuí' hpum' pe' Eun na' Eun yeuh pe' htonnuk ri hk'a' ren'kawn na' maeé' hk'a' kuit nyawk' kuit sam'ran cumyen' na' kopti han' pe' maeé' Heun na' reu'.

Paw'lu sangsawn' eun leukah' mun' ri peue un' meuh peue ceu Yu'da na' ce

¹⁴ Ec'awng' na' pe', yum' uí htonnuk pe' ri ku' chak' na', htonnuk pe' ri cú'yi na' maeé' cang sangsawn' pe' puri pun na'. ¹⁵ Hat'han' uí' ri tem' lawng ku' ti ri ceu ri pe' na' seun' punta kaw uí' deun' sati pe' ri lawng ceu nang aen' ce baeé' na' a meuh kopti mun' tuil' Eun Peucawo' ri uí' na'. ¹⁶ Eun

† 15:9 15:9 2 Samoela' 22:50; Suk'seun' 18:49 ‡ 15:10 15:10 Saw'n leukah' mun' 32:43 § 15:11 15:11 Suk'seun' 117:1 * 15:12 15:12 I'saya' 11:10

kah uí' meuh mhai' Eun Yesu' Hkrit, kah uí' heul' ri peue un' meuh peue ceu Yu'da na' ce. Eun kah uí' yeuh kan' ce peue jhawp' rit, a meuh heul' pao' leukah' mun' ren'kawn Eun Peucawo' na' ri punta peue un' meuh peue ceu Yu'da na' kaw ce keut' ri meuh ku' tan ku' Peucawo' rap Eun ri ti pun na', a meuh ku' pun ri saic' ri seunga' chak' ri Cit' seunga' chak' na'.

¹⁷ Kop awn' na hk'a'naee Yesu' Hkrit Eun, uí' cang mhawng' ri hk'o'cuin ri ku' yeuh uí' mhai' pun Peucawo' Eun na'. ¹⁸ Daecti a lawn un' meuh yawo ku' Yesu' Hkrit kah Eun uí' yeuh palkoe na' ko', uí' hkuin' kaw hat' ri mhawng' ri hk'o'cuin maeé' ku' seubu na' saec' ti ceu. Eun kah uí' va peue un' meuh peue ceu Yu'da na' ce ing' yum' Peucawo' Eun ri ku' lah' ku' yeuh uí' ¹⁹ ri tí'ca ka het' keuting maeé' tí'ca ka ku' hk'o'am' ri tí'ca ka Cit' seunga' chak' na'. Rot ti pun uí' ri pao' leukah' mun' ren'kawn Eun Hkrit na' htonnuk ku duih' na' hk'awp' tang' neum veng Yeru'salaem na' rot ti veng I'li'ri'hkum' na'. ²⁰ Neumneum ka na' ko', tang' uí' hpum' ri kaw heul' pao' leukah' mun' ren'kawn na' vang peue un' nang duing mhawng' lawng Eun Hkrit na' ku duih'. Aen' meuh a punta kaw uí' un' pun ri go' hk'a' pang ka kleum' vang peue seubu na' uin' ce na'.

²¹ Hot' seun' ku' tem' a ri nang htawm Seunga' na',

“Peue un' duing kue' nang ris lawng Eun na', kaw eun pun ri nyu.

Peue un' duing mhawng' na', kaw eun leuceng pun a.”†

²² Heul' pao' leukah' mun' ren'kawn na' meuh a ku' hko'ka uí' laleung na', a yeuh uí' un' cang ing' ri pe'.

Paw'lu rangraen Eun hk'a' kaw ri heul' kuing' Ro'ma

† 15:21 15:21 I'saya' 52:15

²³ Daecti maet'maen', nang kuing' aen' ce a hkuin' laee kue' vang kaw uí kah ri yeuh kan' na' mae' kopti sum' heul' uí ri pé neum ling' neum seungai hawc' na', ²⁴ uí raen hk'a' kan' kaw ri heul' ri pé yam heul' uí nang kuing' Sapen na'. Uí keutuí hpum' kaw ri heul' glue ri pé yam hpai uí hk'a' na'. Yam hawc' e' ren'kawn hk'a' nyum hk'a' munkvaen ri tiduih' ti cu hkao' na', uí ku keutuí hpum' pé na' teum'kawm uí heul' rot teh'. ²⁵ Daecti maet'maen', uí buih heul' nang veng Yerú salaem punta kaw uí teum'kawm peue Eun Peucawo' ut' teh' na' ce. ²⁶ Kopti ec'awng' ut' nang kuing' Masido'ni' mae' kuing' Ahkaiya' na' ren'kawn ro ce paec tan ri tuil' a ri peue Eun Peucawo' ku' hk'o'tukyak ut' nang veng Yerú salaem na' ce. ²⁷ Ce ren'kawn sum' yeuh ku' yeuhki' na'. Neumneum ka na' ko', kue' ce ku'ma ri ec'awng' awn' ce yeut. Kopti peue un' meuh peue ceu Yu'da na' ce lawn pun ri pawng' ri lec hk'a'naee mun' hk'a' civit ce peue ceu Yu'da na' ko', ce ku' kue' ku'ma ri peue ceu Yu'da na' ce. Ce na' htuk' ri gvah mun' hk'a' vahtu' ri na' ri ec'awng' awn' ce. ²⁸ Kop awn' na, yam hawc' uí kan' aen' ce na' mae' hawc' yawng uí ec'awng' aen' pun ce paec tan na' meulamlam ri na', uí kaw heul' nang kuing' Sapen, uí na' ba' ri veh glue ri pé lang' hk'a' ri. ²⁹ Yawng uí yam ing' uí ri pé na', uí kaw ing' mae' mun' htonnuk Eun Hkrit na'.

³⁰ Ec'awng' na' pé, meuh a kopti Cawo' e' Yesu' Hkrit Eun na' mae' hk'a' leumeus'keus ka Cit' seunga' na' uí hk'o' pé pawng' uí mae' ku' hko'ka uí na' ri hk'o' mun' pun uí ri Peucawo' Eun reu'. ³¹ Hk'o' pé hk'o' mun' kah uí pun ri rap ri ti hk'a' teum'kawm kah uí sa'pa sam'ran hk'ai' peue un' yum' ut' nang kuing' Yu'da na' ce, mae' hk'o' pé hk'o' mun' kah peue Eun Peucawo' ut' nang veng Yerú salaem na' rap ce ri ti hk'a' teum'kawm uí na'. ³² Aen' meuh a punta kaw uí ren'kawn ing' ri pé hot' alo Eun

Peucawo' na' maeé punta kaw uí hpum' sam'ran maeé pé na'. ³³Kah Peucawo' hk'a' ut' sam'ran cumyen' na' Eun ut' maeé pé' reu'. Amin.

16

Leukah' tisut'

¹ Bu' uí Febi meuh awng' beun' ye ku' meuh nang teum'kawm muk kon' Hkrit hk'a'naee veng Kechel na' eun heul' ri pé. ² Uí tawm' pé na' rap ri ti eun hk'a'naee Peucawo' Eun kuing'hpaw maeé meuh eun peue Eun Peucawo' na' maeé teum'kawm eun hot' seun' ku' lo' eun na' reu'. Kopti pun eun ri teum'kawm peue heun' na' ce maeé eun ku teum'kawm uí ri yeut.

³ Pli'si'la' maeé Ahkio'la' ku' yeuh kan' maeé uí hk'a'naee Yesu' Hkrit Eun na' lah' ka mhawng' leunyeng uí ri ka. ⁴ Punta kaw uí pun ri pon na', ka hkuin' laee mang' a'yu ri. A hkuin' meuh uí ri koe, daecti muk kon' Hkrit un' meuh peue ceu Yu'da na' ce ku kuit rot ri mun' ka yeut.

⁵ Muk kon' Hkrit hk'om puri nang nya ka na' lah' ce mhawng' leunyeng uí ri ce.

E'penetas' a'mawo leumeus' uí ku' meuh nang ing' yum' Hkrit Eun nanggal' nang kuing' Asa' na' lah' eun mhawng' leunyeng uí ri heun.

⁶ Mari' ku' sae'caee' yeuh kan' pun pé na' lah' eun mhawng' leunyeng uí ri heun.

⁷ Andronikas' maeé Yu'nias' ec'awng' uí ku' tawn ut' nang htawng' maeé uí na' lah' ka mhawng' leunyeng uí ri ka. Ka meuh nang muis chak' hk'a'naee muk ce peue caee Eun Yesu' na' ce. Ka ing' yum' Hkrit Eun nanggal' yam un' nang yum' uí na'.

- 8 Ampliatas' ku' meuh peue leumeus' ui' eun hk'a'naee Peucawo' Eun na' lah' eun mhawng' leunyeng ui' ri heun.
- 9 Eubanas' ku' meuh a'mawo e' yeuh kan' hk'a'naee Hkrit Eun tiduih' na' mae' Satahkis' a'mawo leumeus' ui' na' lah' ka mhawng' leunyeng ui' ri ka.
- 10 Apelles' ku' pun ri hkam' hk'a' cop'long hawc' eun pun ri rap ri ti hk'a' htawhkam hk'a'naee Hkrit Eun na' lah' eun mhawng' leunyeng ui' ri heun.
Peue ut' nang nya eun Aris'tobulas' na' lah' ce mhawng' leunyeng ui' ri ce.
- 11 Herodion ec'awng' ui' na' lah' eun mhawng' leunyeng ui' ri heun.
Peue nya peue hk'ul' eun Nasisas' ku' ut' hk'a'naee Peucawo' Eun na' lah' ce mhawng' leunyeng ui' ri ce.
- 12 Trifena mae' Trifosa beun' ku' sae'caee' yeuh kan' hk'a'naee Peucawo' Eun na' lah' ka mhawng' leunyeng ui' ri ka.
Peusis' a'mawo leumeus' ui' na' lah' eun mhawng' leunyeng ui' ri heun. Eun meuh beun' seubu ku' sae'caee' yeuh kan' hk'a'naee Peucawo' Eun.
- 13 Ru'fas' ku' leuk ri uin' ri hk'a'naee Peucawo' Eun na' lah' eun mhawng' leunyeng ui' ri heun. Ma eun na' seun' ka ma ui' ko'.
- 14 Asihkiotas', Hplekon', Heumes', Patrobas', Heumas' mae' ec'awng' ut' mae' ce na' lah' ce mhawng' leunyeng ui' ri ce.
- 15 Hpi'lolokas', Yu'lia, Nere'as', awng' beun' eun Nere'as' na' eun, Olipas' mae' peue Eun Peucawo' ku' ut' mae' ce na' lah' ce mhawng' leunyeng ui' ri ce.
- 16 Yam hk'eup' puri na', gloh' ti' puri hk'a'naee vang seung' chak' na' reu'.
Muk kon' Hkrit Eun Hkrit na' ce tawm' a ce lah' ri

leunyeng ri pé.

¹⁷ Ec'awng' na' pé, hk'o' uí' pé uin' sati ri ri peue yeuh pé gvah muk gvah cum yeuh pé seuduih leuveul' ri na' ce. Aen' meuh a ku' hkat' hkan leukah' sangsawn' pun pé ri rin na' ce. Ut' seungai ce peue awn' na reu'. ¹⁸ Kopti peue awn' hpaw ce ca' yeuh mhai' Eun Cawo' Hkrit e' na' Eun. Daecti yeuh ce pun pal yawo ta'nha' ri na' meun. Ce cop'long peue cang cu ku' yeuh peue na' ce ri leukah' munngawn na'. ¹⁹ Peue gawm'euc' na' pun ce ri mhawng' lawng hk'a' yum' pé na' hawc'. Saec' uí' ri, uí' ku ren'kawn hk'a'nae pé nyawk'. Daecti uí' sum' kah pé heng'laet' hk'a'nae hk'a' chak' na', sum' kah pé na' nga' ri hk'a'nae hk'a' rai na'.

²⁰ Un' ling' ko', Peucawo' ka hk'a' kuit nyawk' kuit sam'ran cumyen' na' kaw Eun toc'tec' Satan na' hk'a'ruim dak cung pé.

Kah mun' sin' Eun Cawo' e' Yesu' na' kue' ri pé reu'.

²¹ Ti'mo'se a'mawo yeuh kan' mae' uí', Lusias', Jesan' mae' Sosipahte' ec'awng' uí' na' ce tawm' a lah' ri leunyeng ri pé.

²² Meuh uí' Teutias' cawo' tem' htawm aen' a hot' seun' ku' Paw'lu lah' eun a, eun kah uí' tem' a na'. Uí' ku bu' leukah' leunyeng ri pé hk'a'nae Peucawo' Eun.

²³ Gaias' ku' hpum' vah hpum' hk'o'ren' rap ri ti uí' mae' rap ri ti muk kon' Hkrit maen' na' eun ku tawm' a lah' ri leunyeng ri pé.

E'ratas' cawo' roksa' leumuil ka veng aen' a na' eun mae' Hkeotas' ec'awng' uí' na' ka tawm' a lah' ri leunyeng ri pé.*

* **16:23** 16:23 Nang htawm Seunga' seubu na' kue' nambat aet' 24. A lah', "Kah mun' sin' Eun Cawo' e' Yesu' na' kue' ri pé ku peue ri reu'. Amin."

²⁵ Maet'maen', ri Peucawo' Cawo' cang yeuh pe' cawng keutawn' ri leukah' mun' ren'kawn ui' na' maeé' ri hk'a' pao' lawng Eun Yesu' Hkrit na' hot' ku' yeuh Eun é' nawk vangdoh' rui' ka ku' mo' ri tang' neum yam na' un' nang tang' a ri ²⁶ daecti maet'maen' Eun tuh' é' nyu yawng a glih'gleueng' ri htawm Seunga' tem' ce peue suip leukah' Eun Peucawo' na' ce hot' seun' leukah' tuil' Eun Peucawo' cot'cu na' Eun punta peue ceu gawm'euc' na' kaw ce pun ri yum' pun ri leuceng Eun na', ²⁷ ri Peucawo' Cawo' kue' cu'yi nyawk' ti peue yawo na' Eun, hk'o' munhpung' na' kue' ri Heun cot'cu ri Yesu' Hkrit Eun na' reu'. Amin.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 19 Oct 2021 from source files dated 14 Jul
2021

0468b0b5-acb2-59c4-92d3-4fa09a4d091c